

PABOJA ETEHUE CONITO CUIÑAJIJO BA'E YASIJJE BECANEJJIJI PEA'AI 2 CORINTIOS

*Pabohua tecue ca o'oyanaje Jesosaja epeeji
cuana Conitojo ba'e yasijje*

¹ Eya Pabo, Jesosa Quitoja huoojea'yo oja sohui huohuiji. Jamaya Eyacuiñajjiya a sa acani. Timoteo esejaya epeeji enijje nequi. Eyaya tehueaña miquiana huasijje. E'e, miquiana Jesosaja epeeji cuana Conito cuiñajjiyo ba'e yasijje, ma Acaya meshijo ba'e yasijje cuanaya tehueaña eyaya.

² ¡Eseyaya Emeshi Mese neiya Jesosa Quitohua, Eyacuiñajjiya, esejaya Chii neiya pea'ai miquianaya cajaanuana neinei cahua; quea bei caba'e mee cahua pea'ai!

Pabo Eyacuiñajji nijje mimiani quea bihui

³ ¡Eyacuiñajji ejjabihuaqui! E'e, oya esejaya Emeshi Mese nei Jesosa Quitoja Chii, esejaya Chii nei pea'ai poani. Oya esejo jjashahuabaquiani quea bei. Ohuaya eseya quea bihui nee po mee cani pea'ai. ⁴ Eseyaya quea nee, quea yeno poanijo, ohuaya quea bihui nee po mee cani. Quea bihui nee po majje eseyaya pea cuana quea bihui nee po meeje'yo, yeno'ama pea'ai. Jamaya eja'aquei ba'a: —Eyacuiñajjiya ecuana jaahuana cani. Oya miquiana jaahuanajji poani pea'ai. Jamajjeya ja'a quea yeno pojji!

⁵ Jesosa Quito quea nee poanaje dejja mimishi cuaa napa cajje. Eseyá onijje jjapeequianijo, pea cuaa eseyá napa caje pea'ai. Jamatii, eseyá quea bihui nee po mee caje Jesusaa. Majoya eseyaya pea cuana quea bihui nee po meesahuaje Jesosa nijje. ⁶ E'e eyaya, Timoteohua pea'ai esohui huohuiaña Jesusajo. Jamajjeya pea cuaa ecuana napa cani. Jamatii, ecuanaja esohui shajja'ajja majje miqúanaya Jesosa nijje jjapeequi'yani. Ohuaya miqúanaja mimishi cuana cuijea ca'yonaje. Jamajjeya miqúanaya quea bei nee poani. E'e, Jesusaa ojaya epeejji quea ca'a nee po mee canijo, miqúanaya quea ca'a nee poaje pea'ai. Jamajjeya pea cuaa miqúanaya napa cajje Jesusaja epeejji quea ca'a nee poaje tii. Onijje jjapee tiiti-iquije'yo pea'ai. E'e, Jesusaa miqúanaya ojaya epeejji quea ja'a po mee caje'yo ecuana jayojjaya, quea bei. ⁷ Jiquio ecuanajaya eba ba'a: Miqúanaya Jesusaja epeejji quea ja'a po tiiti-ije'yo. E'e, miqúanaya ecuana jayojja poaje. Jesosa nijje jjapeequianijo, pea cuaa napa caje. Jamatii Jesusaa miqúanaya quea bei nee po mee caje ecuana jayojjaya. Jamaya Jesusaa acaje'yo miqúanajo, ecuanajo pea'ai.

⁸ Epeejji cuana, jjeya ecuaaya huohuije quea nee ecuana poanaje Asia meshijo nequi miqúanajaya ebajji. Jomajo ecuana ba'enaje quea camaja nee nee, quea mano poanaje. E'e, ecuana jjashahuabaquinaje jama ba'a: —E'e, ecuanaja quea camaja nee nee Jesosa nijje ejjapeequijji, jiquio meshijo pojja'a mo manojé'yo. ⁹ E'e, mimishi cuana jjashahuabaquiani ecuana quecuajji.

Eyacuiñajjiya ecuana ba mee canaje jama ba'a: Dejja cuanaja ecuana ejaahuanajji pojjeama. Oya oe nei ecuana jaahuanajji poani. Ohuaya ohuaye nei emano'yojaa cuana shequi mee ca o'oyani. Jamaya eseya ba mee canaje Eyacuiñajjiya.

¹⁰ E'e, mimishi cuaa napa huicha'a huicha'a cajje, ecuana quea nee nee poanaje. Beshahua nei mano'yonaje quea nee nee poanijo. Jamatii, Eyacuiñajjiya ecuana jaahuana ca'yonaje; mano'yo jjima Asia meshijo nequi. Ecuana jjashahuaba titiiquiani jama ba'a: —Eyacuiñajjiya ohuaye neiya ecuana jaahuana tiitii canijo, mano'yo jjima jjeya.

¹¹ E'e, miquianaya Eyacuiñajji nijje miminaje ecuana ojaya ejaahuana tiitiiiji. Jamajjeya ohuaya miquianaya shajja'ajja canaje onijje mimiani. Ecuana jaahuana canaje. Jamajjeya quea huiso Jesusaja epeeji cuaa Eyacuiñajji bihuia caje jama ba'a: —Eyacuiñajji, miya quea pame nee nee. Miquea epeeji jaahuanaña quea ja'a nee.

Pabo Conito huasijje poqui jjima poaje

¹² Ecuanaja eba'ejjijo, echacojjijo, ehuhuijjijo pea'ai ecuanaya quea bihui nee huohuiaña. E'e, miquiana nijje, ojjaña pea cuana nijje nequinajejo pea'ai e'e jojo nei ecuanaja echaco quea pame nee poanaje. Eyacuiñajjiya ecuana chaco meesahua canaje ojo quea pame nee. Ecuanaja ejjashahuabaquiji quea ja'a nee pea'ai. Dejja cuanaja ejjashahuabaqui'yojji jayojja jama ba'e ajja. Chojja, de. Eyacuiñajjiya ecuana ba'e meesahua cani ojaya esohui jayojja. ¹³ Ecuanaja esohui etehue'yo miquiana huasijje quea ja'a nee. Esohui quea quehua tehue jjima. Eya jjashahuabaquiani

jama ba'a: ¹⁴ Yahuajo miquiianaaya ecuana ba pishana majje ejjaba'e bamequi'yoyji banaje. Quijje quea ja'a nee baje'yo ecuana ba neinei majje. Jamajjeya Jesosa, Emeshi Mese nei poe o'oyajo, ecuaaya oya huohuije'yo miquiiana ojaya epeeji quea pame poanaje. Cuanaya ojaya esohui jayojja ba'yanijo, miquiianaaya quea bihui nee ecuanajo huohuije'yo Jesosa poe o'oyajo.

¹⁵ E'e, ecuea eba miquianaya jjabahuejjaquije eya esohui jayojja quea ja'a ba'yani. Jamajjeya jjeyahua nei eya miquiiana que poqui o'oya sa poanaje miquiiana Jesosajo quea ja'a nee ba'e meesahua o'oyaa. ¹⁶ Yahuajo eya jjashahuabaquinaje jama ba'a: —Jesosaja epeeji cuana Masenonia meshijo ba'e yasijje poquije eya dobiquinanaje Conito cuiñajji yasijje Jesosaja epeeji cuana sohuihuohuiya. Ma ba majjeya eya poquije Jodea meshi yasijje. Jamajjeya Conitojo ba'eca cuaa eya poqui meesahua caje pojja'a Jodea meshi yasijje —eya jjashahuabaquinaje.

¹⁷ Jamatii eya poqui jjima miquiiana baa. Miquiana baquijji eya jjashahuabaquinaje quea ja'a nee. Ecuea epoquijjijo eya jjashahuabaqui ajja pea cuana jayojja jama. Jesosaja epeeji pojjeama cuaa huohui cani jama ba'a: —Eya poquije. Chojja, eya poqui ajja —jamaya eya jjashahuabaqui ajja. Eyaya ecuea ejjashahuabaquijji jayojja jama aje'yo. ¹⁸ Eyacuiñajji siajje po ajja, ojaya esohui jayojja jama ohuaya acani. Ojaya eba eya o jayojja e'e nei poani, siajje po ajja jama ba'a: —E'e pojja'a, de —jamaya eya siajje po ajja.

¹⁹ Eyaya Sinasi nijjeya, Timoteo nijjeya pea'ai Jesosa Quitojo huohuinaje miquiana huasijje. Oya Eyacuiñajjija Bacua Ejja. Ojaya esohui jayojja jama acaje'yo e'e jojo nei, ohuaya. ²⁰ Eyacuiñajjija esohui yahuaajo quea huiso, quea pame nee nee. Jesosa Quito ese jaahuanaa poeyanaje. Ohuaya ojjaña Eyacuiñajjija esohui yahuaajo jayojjaya jama jjeya acaje'yo esejo. Jamajjeya Jesosa Quitohua Eyacuiñajjija esohui jayojja jama acanijo, eseyaya Eyacuiñajji bihuiaña jama ba'a: —Jamaya Eyacuiñajji, miquea esohui quea pame nee nee, quea huiso ecuana nijje. Ojjaña e'e jojo nei poani. Miya siajje po ajja nei nei —jama bihuiameya seya año.

²¹ Eyacuiñajjiya ecuana, miquianaya pea'ai ojaya epeeji po mee canaje. Ohuaya eseya babaca ca'yonaje onijje ejjapeequijji. ²² Jama esejo acanaje ba'a: —Miquianaya ecuea epeeji cuana poani. Ecuea ejjeshe jayojja jama miquianaya —Eyacuiñajji poanaje.

Eyacuiñajjiya ese que huoojea canaje Edojjoshahua Pame ese jaahuanajji. Edojjoshahua Pameya eseya ba mee cani jama ba'a: Quijje eseya quea ja'a nee Jesosa jayojja ba'e tiitiije'yo Eyacuiñajji nijje eyajo.

²³ Eyacuiñajjiya ba cani ecuea ejjashahuabaquijji miquianajo quea pame nee poani. Jama poani eya ba'a: —Conito huasijje jjeya epoquiya jjemo eyaya onaya tecueajea'yome pojja'a, quea mimishi ba'yanijo. ²⁴ Eya miquianajaya emeshi mese pojjeama, miquiana huoojea neinei'yojji pojjeama. Eyaya ca ca esohui huohuiaña, Jesusaja esohui, miquiana quea bihui nee po meeji. E'e,

Jesosaja esohui jayojja jama añajo, ojaya epeeji quea ja'a nee poaje'yo miqianaya.

2

¹ Jjeya eya jama jjashahuabaquiani ba'a: — Jjeya Jesosaja epeeji Conitojo ba'e beca cuana quea mimishi poanijo, eya poqui ajja jocuama o tecueaa. Jjabahuejjaqui o'oyajo, quea yeno poaje o'oya oya cuana —eya poani.

² E'e, miqianaya eyaya quea yeno po mee majje, ¿ajeo acuae che eya quea bihui po'yome?

³ Jamajjeya yahuajo eyaya miqianaya tehue-naje quea tecue mimishi pajea mee'yojji. E'e, miqiana quea mimishi poanijo, eya quea yeno poanaje. Pea chama' e quea bihui nee po meeji. Eya jjashahuabaquinaje miqianajo jama ba'a: —E'e jojo nei ohuaya Eyacuiñajjija esohui jayojja jama acaje'yo. Majoya eya quea bihui nee poaje. Oya cuana quea bihui nee poaje pea'ai e'e jojo nei ba'e majje.

⁴ E'e, eyaya quea yeno nee esohui quea tecue tehuenaje miqiana jjabahuejjaqui mee'yojji. Quea camaja esohui quea tecue etehueji. Miqianaya quea yeno po mee sa po'yo ajja. Chojja. Eya jjashahuabaquinaje jama ba'a: —Ecuea esohui etehue'yo quea tecue mimishi cuanajo ba majje onajaya eba poaje ecuea quea jea nee nee poani —eya poani. E'e, jamaya ecuea ejjashahuabaquiji miqianajo.

Jesosaja epeeji quea mimishi tecuea majje ja'a quea tecue po tütüjji onijje ohua mimishi pajea cajo!

⁵ Jesusaja epeeji miqiana nije nequi ca ca oe quea mimishi poanaje. Eya quea yeno nee poanaje ojo. Miquianaya quea yeno poanaje pea'ai ojo. Jamajjeya eyaya o jjabahuejja meequijji tehuenaje oja mimishi cuana pajea mee'yojji. ⁶ Beshahua nei miqianaaya, ojjaña oya jjabahuejjaqui meenaje ojaya mimishi epajea'yojji. Apoa. ⁷ Jamajjeya ja'a oya quea yeno po tiitii meejji! ja'a oya tecuea tiitijji! Chojja. Quea yeno nee nee po tiitii majje oya Jesosa nije jjapeequi pajea'yo chana'. Jjabahuejjaqui'yajo, jonijje jjapeequi'yocue quea pame nee! ⁸ E'e, oya jama huohucue ba'a: —Miya ecuanaja quea boti nee, epeeji —jamaya oya acue.

⁹ Yahujajo eyaya ma esohui tehuenaje miqiana ba'ajjaji so'o. Eya ba sa poanaje jama ba'a: —¿A'a shajjama' poaje? ¿A'a ecuea esohui jayojja jama poaje? —poanaje.

Jamajjeya eyaya esohui tehuenaje miqiana huasijje ma dejja quea mimishi jjabahuejjaqui mee'yojji. Miquianaya ecuea esohui etehue'yo jayojja jama po'yonaje. Quea pame. Apoa poanaje. ¹⁰ Jamajjeya miqianaya ma dejja quea mimishi poani nije quene'ama poajo, eya onijje quene'ama poaje'yo pea'ai. E'e, ecuea aje ojaya mimishi epajea'yo pea'ai. Eya Jesosa Quitoja esohui huohuijji poanijo ma dejja mimishi nijje quea tecue poanaje. Jjeya ma dejja nije tecue'ama poanaje. Jamajjeya imiquianaya pea'ai quea bei, quea ja'a pocue! ¹¹ Esey a quea bei, quea ja'a poanijo, Edosiquiaa eseya edasiajji pojjeama. E'e, esejaya eba Edosiquianaja ejjashahuabaquijji. Oya aje oe edasiajji poani, de, Jesusaja epeeji

cuana quea mimishi po mee o'oya sa acani.

Jesosaja ehuohui eyacua

¹² Yahuajo pishana eya poquinaje Toasa cuiñajji yasijje esohui quea pame Jesosa Quitojo huohuiya. Jomajo esejaya Emeshi Mese neiya Jesosaa eya huohui meesahua canaje. Beca cuaa shajja'ajja canaje quea bihui nee. ¹³ Jamatii ecuea epeeji Tito poe jjima Toasa huasijje. Eya quea mete ojo poanaje: —E'e pojja'a oya quea huesha nee quea mano jaa pojja'a, quea nee poani pojja'a —jjashahuabaquinaje. Jamajjeya eya Toasajo ba'e nijje miminaje jama ba'a: —Poquia iña Tito sa'ajjaa.

Majoya eya poquinaje Masenonia meshi yasijje.

¹⁴ Eseyaya Eyacuiñajji bihuiaña. Ohuaya eseya quea ja'a nee nequi mee cani. E'e, ohuaya eseya dejja mimishi cuana mimicuiajejanobiajea meesahua cani; eseya Jesosa Quito nijje jjapeequi mee cani quea ja'a nee. Ohuaya ecuana huohui meesahua cani ojjaña meshijo Jesosa Quitoja esohui. Ma esohui quea pame nee nee. Jiquio ecua shiyeshiye esejaya quea boti nee aña jama jayojjaya Jesosaja esohui ecuanajaya quea boti nee. ¹⁵ E'e, Eyacuiñajjiya ecuana huoojea ca'yonaje Jesosa Quitojo huohuiya. Ma esohui quea pame nee nee, ecuanaja quea boti nee nee. Jamajjeya ojjaña Jesosaja epeeji cuaa, ma Eyacuiñajjiya onijje ba'e tiitii mee caje'yohua, ojjaña quea mimishi poaniya pea'ai ma quijje quea nee nee po tiitijje'yohua pea'ai ba caje'yo Eyacuiñajji quea pame nee: —E'e Eyacuiñajji, miya quea pame nee nee. Pea chama' mi jayojja —oya bihuiaje eseyaya.

16 E'e, Jesosa Quitoja esohui shajja'ajja majje ojjaña mimishi cuana jjabaquiye oya cuana ca-jaa'ya'yo, quea nee nee poaje'yo cuaquiyo. Ma esohui shajja'ajja majje Jesusaja epeeji cuana ca ca jjabaquiye oya cuana ba'e tiitiije'yo quea ja'a nee eyajo Eyacuiñajji nijje. 17 ¿Aya acuae maya esohui eyacua Jesusajo huohui caje pea cuana huasijje, de? Ma esohui quea pame Jesosa Quitojo ecuana huoojea majje sohuihuohui meesahua caje quea ja'a nee, ohuaya. Pea cuaa Eyacuiñajjija esohui huohui cani bejjo sosejje. Ecuana, chojja. Ecuaya, Jesusaja epeeji poaniya quea bihui nee huohuiaña e'e jojo nei. Ecuana eba jama ba'a: E'e jojo nei Eyacuiñajjiya ecuana huoojea ca'yonaje ojaya esohui huohuiya.

3

Jesosa nijje chaco cani esohui eyacujajo

1 E'e, Eyacuiñajjiya ecuana huoojea ca'yonaje miquiana huasijje ojaya esohui huohuiya. Pea cuaa miquiana que quia ca'yonaje esohui peaja tehue'yo jama ba'a: “¡Jiquio dejja Jesusaja epeeji e'e jojo nei! ¡Jamajjeya oya cuana shajja'ajjacue!” Ecuana ca ca peaja tehue'yo equiajji pojjeama miquiana que jama ba'a: “¡Pabo quea pame nee; oya shajja'ajjacue!” Chojja. Ecuana miquiana-jaya eba Eyacuiñajjija huoojea'yo. 2 Ecuana jama jjashahuabaquiani ba'a: —Ojjaña ba cani ecuanajaya esohui shajja'ajja majje Jesusaja epeeji quea pame nee poanaje miquianaya, Conitojo ba'e cuana.

Jamajjeya ecuana e'e jojo nei Eyacuiñajjiya huoojea'yo ojaya esohui huohuijji ojjaña eba, de. Jamajjeya esohui mi tehue mee cani jama ba'a: "Pabo quea pame nee, Eyacuiñajjiya huoojea'yo".

³E'e, ojjaña ba cani miquianaya Jesusaja epeeji cuana poanaje ecuanaja esohui shajja'ajja majje. Edojjoshahua Pameya miquianaya Jesosa nijje jjapeequi meesahua ca'yonaje. Yahuaajo nei Eyacuiñajjiya esohui mei beje biajje tehue majje ojjaña ba mee ca poa etiiquiana Moisesi oja huoojea'yo. Jjeya ca ca Eyacuiñajjiya Edojjoshahua Pameya miquianaya Jesosa Quito nijje jjapeequi meesahua ca'yonaje ecuea esohui miquiana shajja'ajjajo. Jamaya ohuaya ojjaña ba mee canaje eya oja huoojea'yo, ojaya esohui huohuijji.

⁴Ecuanajaya eba Eyacuiñajjiya ecuana Jesusaja epeeji quea ja'a nee po mee majje huoojea canaje miquiana huasijje esohui huohuiya. ⁵Jamajjeya jama jjashahuabaquiani ecuana ba'a: —¿A'a ecuana quea pame nee poanijo, quea sapa ja'a poanijo esohui huohuije quea ja'a nee? Chojja. Eyacuiñajjiya ecuana esohui huohui meesahua canijo ca ca quea ja'a nee poani ecuanaja esohui —jamaya ecuana jjashahuabaquiani.

⁶E'e, Eyacuiñajjiya ecuana huohui meesahua cani ojaya esohui eyacua Jesusajo. Etiiquianaja esohui jayojja jama pojjeama ecuanajaya esohui; eyacua. Ecuanajaya etiiquiana Moisesija esohui yahuaajo nei etehue'yojo ojjaña ba ca poa jama ba'a: —E'e jojo nei mimishi poajo, Eyacuiñajjiya ojjaña quea nee nee po mee caje'yo tii tii; Eyacuiñajji nijje eba'e'yojji pojjeama.

Jjeya ca ca ecuaaya huohuiaña jama ba'a: — Mano'yajo, Edojjoshahua Pameya Jesosaja epeeji cuana ba'e tiitii mee caje'yo —ecuaana poani.

⁷ E'e, yahuajo nei Moisesiya ojjaña jama tehueme aca poa ba'a: “Eseya quea mimishi poajo, Eyacuiñajjiya quea nee nee po mee caje'yo tii tii cuaquijo”. Jamatii Moisesiya Eyacuiñajjiya esohui quea tecue mei biajje tehue majje ojaya ecojja quea jiji nee nee cuaquijiji jayojja poa esohui quea pamejojo. Jamajjeya Isaeni cuaa Moisesija ecojja ba jjima aca poa quea siyo nee neejojjo. Jamatii ojaya ecojja quea jiji nee po tiitii jjima poa. Quijje pishana quea jiji pojjeama po'ya poa. ⁸ ¿Ajea esohui quea pame nee nee po tiitiije? ¿A'a Moisesija pojja'a? ¿A'a Edojjoshahua Pameja? Edojjoshahua Pameya eseja ba'e tiitii mee canijo quea pame nee; e'e, Moisesija iye bame bame. ⁹ ¡Bacue! Moisesija esohui etehue'yo quea pame pishana ojjaña cuaa ba canaje jama ba'a: Eseja quea mimishi poajo, Eyacuiñajjiya quea nee nee po mee caje'yo tii tii.

Edojjoshahua Pameya ca ca eseja Eyacuiñajjiya epeeji mimishi'ama po mee cani. Quea pame nee nee Edojjoshahua Pameya eseja acani. ¹⁰ Yahuajo nei Moisesija etehue'yojo ojjaña jjashahuabaquinaje ojaya esohui etehue'yo quea pameya poa. Jjeya pea ejjashahuabaquijji yani. Jjeya ca ca esohui quea pame nee eba'e tiitijji ecuanajaya eba. Quea pame nee nee esohui eyacua poani. ¹¹ E'e, yahuajo nei ojaya esohui etehue'yo quea pame neejojjo Moisesi ma esohui tehue majje quea cojja jiji poa, quea cojja jiji nee epo tiitijji pojjeama. Jjeya ca ca esohui eyacua

quea ja'a capo tiitii'yahua. E'e, ecuana ba'e tiitii mee caje'yo quea pame nee nee epo tiitiiiji.

¹² E'e, ecuanajaya eba Edojjoshahua Pameya ecuana ba'e tiitii mee caje'yo. Jamajoya ma esohui eyacua huohui tiitiiña bicho'ama. ¹³ Moisesi esohui tehue majje quea cojja jiji nee poa. Jamajjeya ojjaña cuana ojo quea mete poanijo, Moisesi jjacojja dodoqui'ya poa Isaeni cuana mete'ama epojji. Ecuana ya ca ca Moisesi jama pojjeama. Esohui eyacua eba'e tiitiiiji nahue ajja; huohui majamajaña ojjañaja ebajji. ¹⁴ E'e, yahuaajo Isaeni cuaa Moisesija esohui etehue'yo shajja'ajja majje jamatii eba'e tiitii'yojji ba meeme ajja poa. Esohui eyacua onajaya quea quehua poa. Ejjacojja dodoqui jayojja oya poa. Jesosa Quitoja epeeji nei poanijo ca ca ohuaya esohui eyacua eba'e tiitii'yojji ba mee cani. ¹⁵ Jjeya nei pea'ai Isaeni cuaa Moisesija esohui etehue'yo shajja'ajja canijo esohui eyacua eba'e tiitii'yojji onajaya quea quehua. ¹⁶ Jamatii ojjaña joya Jesosa Quito nijje jjapeequiani ohuaya esohui eyacua ba mee caje'yo quea ja'a nee. ¹⁷ E'e, jamaya poaje Edojjoshahua Pameya, Jesosa Quito-hua pea'ai eseya ba mee caje quea ja'a nee Eyacuiñajji ejjashahuabaquijji. Ma ba majje esohui eyacua esejaya quea ja'a nee poaje. Jamajjeya Jesosa nijje jjapeequi'yajo, ohuaya eseya ba'e tiitii mee caje'yo onijje, Moisesija esohui amajje pojjeama. ¹⁸ Jesusaja epeeji cuana poanijo eseya jjacojja paaqui jjima jayojja jama. E'e, ojjaña ba meeje Eyacuiñajji eseya Jesosa jayojja jama atiitii meesahua cani. Jamajjeya Edojjoshahua Pameya esejaya eyamijo aniya quea ja'a nee jjashahuabaqui mee cani. Jesosa jayojjaya

popoqui mee cani eseya.

4

Pabohua esohui huohui cani quea ja'a nee eba'e meesahuajji

¹ Eyacuiñajji ecuana nijje quea quene nee nee po tiitii ajja ecuanaja mimishi yahuajo poanaje cuanajo. Ecuana quea jea nee poanijo huojea ca'yonaje ojaya esohui eyacua Jesusajo huohuiya. Jamajjeya ecuaaya quea ja'a nee huohuiaña yeno'ama, mete'ama. ² E'e, ma esohui Jesusajo huohuiañajo quea mimishi ba'e'yo ajja. Quea mimishi jjashahuabaqui ajja pea'ai. Edasijji cuana pojjeama. Ecuana esohui Jesusajo e'e jojo nei poani. Jamaya Eyacuiñajjija eba. Jamajjeya ecuanaja esohui e'e jojo nei poanijo, ojjaña jjashahuabaquije jama ba'a: —E'e, jiquio esohui huohuijji cuanaja esohui e'e jojo nei poanijo, eyaya shajja'ajjaje. Oya cuana edasijji cuana pojjeama.

³ Ecuaaya Eyacuiñajjija esohui e'e nei huohui tiitiiña. Jamatii beca cuanaja, Edosiquiana nijje jjapeequianija Jesusaja esohui quea quehua. Oya cuana aje oe quea nee nee poaje'yo tii tii. ⁴ Quea pame nee nee Jesosa Quito. Oya Eyacuiñajji Echii ai jama poani tii. Jamaya esejaya eba. Jamatii dejja mimishi cuana onijje jjapeequi sa po ajja. Oya cuana aje oe cojjama' jayojja, de. Jamajjeya Edosiquiana neiya, ma ojjaña dasijji poaniya oya cuana dasia cani esohui quea pame nee nee Jesusajo ojaya ebajji pojjeama. ⁵ Joya ecuaaya sohuihuohuiaña miqianajaya e bihuiajji pojjeama.

Chojja. Ecuaya huohuaña jama ba'a: —Ecuana miquiana ba meesahuajji poani. Jesosa Quito ca ca Emeshi Mese nei poani. Jamajjeya ¡Jesosa bihuiacue miquianaaya! —ecuanaya miquiana niñeshe'ajji poani.

⁶ ¡Bacue! Yahuaajo nei meshi pana jjimahuajo Eyacuiñajjiya jama huohuime aca poa ba'a: “Quea misi, ¡quea ja'a nee oe po'yocue!” aca poa; jjaja'aqui mee ca'ya poa. Jjeya ohuaya tiiya eseya Jesusajo jjashahuabaqui meesahua cani quea ja'a nee. Jamajjeya oya esejaya eba quea pame nee nee Jesosa, quea ja'a nee nee poani tii. E'e, Jesosa Quito Eyacuiñajji jayojjaya nei nei. Oya esejaya eba poanijo Eyacuiñajji quea pame, quea ja'a nee nee poani tii tii esejaya eba pea'ai.

Ona Jesosa nije jjapee meesahuaquiañajo ba'e tiitiije'yo

⁷ Eyacuiñajjiya ecuana babaca canaje esohui quea pame nee huohuijji. Jamaya quea pame nee, de. Jamatii jiquio ecua meshimisi ca'a'ama jayojja jama eseya ca'a'ama. Jamatii Eyacuiñajjiya eseya ojaya epeeji quea ca'a nee acanijo, ojjaña ba cani jama ba'a: —E'e de, Eyacuiñajjiya quea ca'a neeya Jesusaja epeeji cuana quea ca'a nee o jayojja jama po mee cani. Ojjaña huasijje esohui quea pame nee huohui meesahua cani.

⁸ Mimishi cuaa ecuana napa cani. Jamatii ecuana ejeabichajea'yojji pojjeama. Pea cuana quea mimishi poanijo, quea camaja tii ecuanaja eba'eji. Jamatii quea yeno nee nee pojjeama ecuana poani. ⁹ Mimishi cuaa napa cani Jesusaja esohui ehuhui poaje jjejojo. Jamatii Eyacuiñajjiya

ecuana ejeana'yojji pojjeama. Pea cuaa cuiajea cajo, jamatii ecuana mano'yo ajja. ¹⁰ Jesosa quea nee nee poanaje mimishi cuaa napa majamaja ca'yajje. Oya mano mee ca'yonaje, de. Jamaya ecuana acaje'yo pea'ai pojja'a Jesosa nijje jjapeequianijo. Jamajjeya ojjaña jama acaje ba'a: —E'e jojo nei Jesosaa jiquio dejja cuana ojaya epeeji nei po tiitii mee cani. Mimishi cuaa napa cajje jamatii esohui huohui pajea jjima acani.

¹¹ E'e, pea cuaa ecuana napa majamaja cani Jesosa nijje jjapeequianijo. Ecuana quecua sa acani pea'ai. Jamatii ecuana quea ja'a nee po tiitianijo, ojjaña ba caje Jesosa ecuana jaahuanajji quea ja'a nee. Oya eshe, de. ¹² E'e, mimishi cuaa ecuana quea nee nee po mee cani esohui Jesusaja huohuiañajo. Jamatii ecuanaja esohui shajja'ajja majje miqianaya Jesusaja epeeji poanaje. Jamajjeya ohuaya miqianajaya mimishi cuana cuijea'yo majje ba'e tiitii mee caje'yo.

¹³ Yahuaajo Eyacuiñajjija esohui huohuijjiya Dabiya huohui ca poa jama ba'a: “Ecuea eba e'e jojo nei Eyacuiñajji e jaahuanajji poani. Jamajjeya jamaya eyaya huohuiaña” Dabiya aca poa. Jjeya ecuana Dabi jayojja Eyacuiñajji nijje jjapeequiani. Ecuanaja eba e'e jojo nei Eyacuiñajjiya ecuana jaahuana cani. Jamajjeya ecuaaya esohui huohui tiitiaña jamatii mimishi cuaa napa cani tiiya. Jama poani ba'a: ¹⁴ —Emeshi Mese nei Jesosa mano'yajo, Eyacuiñajjiya oya shequi mee ca'yonaje. Jamaya ecuana mano'yajo, e'e jojo nei Eyacuiñajjiya ecuana shequi mee caje'yo. Ohuaya ecuanaya, miqianaya pea'ai nequi tiitii mee caje'yo Jesosa nijje eyajo —ecuaaya aña.

¹⁵ E'e, quea camaja poani ecuana Jesusaja esohui huohuiañajo. Jamatii ecuanaja esohui ba majje miqúanaya Jesosa nijje jjapeequinaje. Jamajjeya Eyacuiñajjiya miqúanaya ba'e tiitii mee cani. Pea cuana quea huiso Jesosa nijje jjapeequi'yajo, Eyacuiñajjiya oya cuana ba'e tiitii mee caje'yo. Jamajjeya oya bihuia caje jama ba'a: — Eyacuiñajji quea pame nee nee poani. Quea ca'a nee nee poani pea'ai —acaje ojjaña.

¹⁶ Jamajjeya ecuaaya maya esohui Jesusajo huohui pajea'yo ajja. Chojja. Onaa napa cajje ecuana quea nee nee poani. Edejja tii cuana jayojja jama ca'a'ama poaje. Jamatii Eyacuiñajjiya ecuanaja edojjoshahua cuana quea ja'a po tiitii mee cani.

¹⁷ Jjeya onaa napa cajje ecuana quea nee poani Jesusa nijje jjapeequianijo. Quea nee po tiitii'yo ajja. E'e, jjeya quea nee poani. Jamatii Jesusa nijje jjapeequianijo, quijje ohuaya ecuana ba'e tiitii mee caje'yo quea pame nee nee eyajo onijje. Quea nee popajeaje'yo. Jamaya quea pame nee nee. ¹⁸ Jjeya nei ecuaaya Jesusa ba jjima aña ecojjaa. Jamatii ecuana jjashahuabaquiani Jesusa nijje eyajo eba'e'yojji. Jiquio meshijo eba'ejji ecuana jjashahuabaqui ajja. Jiquiojo ba'e tiitii ajja. Eyajo Jesusa nijje ca ca oe ba'e tiitiije'yo.

5

Eba'ejji quea pame nee eyajo

¹ Ecuaaya jama baña ba'a: Eseyaya mano'yajo Eyacuiñajjiya eyacua pana caje'yo esejaya eyami. Eyami eyacua ani tiitiije'yo eyajo. E'e, eseyaya jiquio meshijo ba'yanijo ca'a'ama. Eyajo ba'e'yo majje

quea ca'a nee eseya poaje'yo tii tii. ² Eseyaya jjeya nei ishoaña eyami eyacua. Cuanaya eseya jiquio meshijo ba'yanijo quea nee nee poani. Jamajjeya jjashahuabaquiani jama ba'a: —Eya poqui sa poani eyahuasijje. Jomajo ecuea eyami eyacua poaje'yo.

³ Jesosa poe o'oyajo, jiquio eyami eyacua poaje. Jiquio ecua jjapipi eyacua poani jama jayojja esejaya eyami eyacua poaje'yo. E'e, eseya jjashahuabaquiani eyami eyacuajo. Quea pame nee poaje. ⁴ Jiquio meshijo ba'yanijo eseya quea nee nee poani. Quea camaja nee jiquiojo eba'ejji. Eseyaya eyami ca'a'ama, jjapipi jjacocoqui jjima jama. Jjacocoqui sa poani. E'e, eseya poqui sa poani eyahuasijje. Jomajo eyami eyacua sa poani. Jiquiojo manojje'yo. Eyacua po majje ca ca eseya ani tiitiije'yo eyajo.

⁵ Eyacuiñajjiya eseya ba'e tiitii mee cani; esejaya eyami eyacua aca'yani pea'ai. Ohuaya Edojjoshahua Pame huoojea canaje ese que ese jaahuanajji. Edojjoshahua Pameya eseya ba mee cani jama ba'a: E'e jojo nei Jesosaja epeejji poanijo ohuaya ecuana eyami eyacua quia caje'yo; ani tiitii mee caje'yo onijje eyajo.

⁶⁻⁷ Jamajjeya jjashahuabaquiani jama ba'a: — E'e, Eyacuiñajjiya eseya ba'e tiitii mee caje'yo onijje. Eseyaya jiquio meshijo ba'yanijo Jesosa cojja nejjo ani ajja. Eseyaya eyami eyacua po majje Jesosa nijje ani tiitiije'yo. Jjeya Jesosa esejaya ecojjaja ba jjima; jjaba meequi ajja. Jamatii eseya jjashahuabaqui mee cani onijje enequi tiitii'yojji. Jiquio meshijo aquiana cuana quea huiso baña ecojjaa. Jamatii ma aquiana cuanao jjashahuaba

neinei qui ajja. ⁸ E'e jojo nei baña Eyacuiñajjiya eseya ba'e tiitii mee caje'yo. Jamajjeya mete'ama, quea bei nee poani. Poqui sa poani Jesosa nijje eba'e tiitii'yojji, Emeshi Mese nei nijje. Ishoaña esejaya eyami eyacua. ⁹ Jamajjeya jjeya nei eseya Jesusaja esohui jayojja jama atiitii sa poani jiquio meshijo ba'yanijo. Quijje pea'ai eyajo onijje ani tiitii'ye'yo. Jamaya sa poani. ¹⁰ E'e, eseya eba jama ba'a: Jesosa Quitohua eyajo ojjaña huoojeajji poanijo ojjaña meshijo ba'ya poa nequi mee caje o cojja neijo. Ojjaña quea mimishi poanaje ohuaya quea nee nee po tiitii mee caje'yo. Ojjaña quea pame poanaje ca ca quea bihui nee nee po tiitii mee caje'yo. Jamaya eseyaya baña.

*Jesosaa ecuana sohuihuohui mee cani ona onijje
ejjapeequijji*

¹¹ E'e, Jesosaa, Emeshi Mese neiya ojjaña quea mimishi poani quea nee nee po mee caje'yo tii tii. Quea tecue nee nee poaje ojjaña quea mimishi poani nijje. Jamajjeya ecuaaya ojjaña dejja cuana huohuiaña jama ba'a: —¡Jesusaja epeejji pocue!
¡Miquea mimishi cuana pajea'yocue!

Eyacuiñajjiya eba ecuana ojaya epeejji poani. Ecuana esohui e'e jojo nei poani, siajje pojjeama. Jamaya ojaya eba pea'ai.

Ecuana jjashahuabaquiiani jama ba'a: —Ojjaña Conitojo ba'eya eba esohui e'e nei ecuaaya huohuiaña.

¹² Jamajjeya ecuana miquiana nijje jama po ajja ba'a: —¡Ecuana bihuiacue quea pame poanijo! —chojja, jamaya ecuana po ajja. Jiquio jama ecuana

a sa poani ba'a: Ecuaya huohui tiitiaña eyacua eba'e'yoggi Jesosa nijje eyajo.

Jamajeya miqianaaya esohui huohuijji nisho huohuicue quea ja'a nee jama ba'a: —Miqianaaya ca ca oe niñebaña Pabo, esohui huohuijji nei. Miya janobajjima nei mimianijo quea pame esohui huohuijji poso jjabaquiani. Jamatii quea ja'a ba'e ajja. ¡Jesosa Quitojo oe quea ja'a nee jjashahuabaquicue! ¡Quea pame a'yocue! —jamaya esohui huohuijji nisho acue.

¹³ Ecuanaja esohui quea pame Jesusajo, eba'e'yoggi eyacuajo pea'ai shajja'ajja majje beca cuana siajje poani jama ba'a: —Pabo niñepoqui, de, ojaya epeeji cuana pea'ai niñepoqui —siajje poani.

Eyacuiñajji nijje chaco tiitiañajo, onaaya ecuana niñepoqui poso acani. Jamatii ecuaya chaco tiitiaña Jesusaja esohui quea ja'a nee miqianajaya ebajji. ¹⁴ Jesosa Quito ecuanajaya quea jea nee poanijo esohui e'e nei huohuiaña. E'e jojo nei ojjaña mimishi acanijo mano tiitije'yo. Jesosa mano'yonaje ojjañaja mimishi cuijea'yoggi, ojjaña cuaqui yasijje epoquijji pojjeamajo. Jamaya ecuanaja eba nei nei. ¹⁵ E'e, Jesosa mano'yonaje ojaya epeeji mimishi cuijea'yoggi. Mano'yajo, Eyacuiñajjiya oya shequi mee ca o'oyanaje. Jamajeya ¡ojaya esohui jayojjaya ca'a cahua! ¡Yahuajo ejjashahuabaquijji capajea ca'yahua! ¹⁶ Jesusaja epeeji cuana po jjimahua ecuana pea cuanajo jjashahuabaquinaje quea tai dejja mimishi jama. Jjeya, cho. Jjeya ecuanaja ejjashahuabaquijji pea cuanajo Jesusaja ejjashahuabaquijji jayojja jama quea ja'a nee poani. Ojaya epee-

jji cuana po jjimahua ecuana Jesosa Quitojo jjashahuabaquinaje quea tai dejja mimishi jama. Jjeya, cho. ¹⁷ Jamajjeya Jesosa Quito nijje jjapeequianijo, ohuaya eseya pea jjashahuabaquime po mee cani. Esejaya ejjashahuabaquijji eyacua quea ja'a nee po mee cani. Jesosa Quito ba jjimahuajo ba'ya poa jayojja po'yo ajja. Jjeya eseya pea jjashahuabaqui'yome poani Jesosa jayojja.

¹⁸ Eyacuiñajjiya Jesosa Quito huoojea canaje esejo mano'yohua. Jesosa mano'yajo, Eyacuiñajji ese nijje quea quene po tiitii ajja. Ese nijje quea bei po'yo majje ohuaya eseya huoojea canaje ojjaña huasijje ojaya esohui huohuiya jama ba'a: —Eyacuiñajjiya Jesosa huoojea canaje eseya mimishijo mano'yohua. Jamajjeya Eyacuiñajji ese nijje quea quene po tiitii ajja. ¡Jesosa nijje jjapeequicue! ¹⁹ E'e, ohuaya Jesosa Quito huoojea canaje ojjañaja mimishijo mano'yohua. Jamajjeya Eyacuiñajji ojjaña ese nijje quea bei poani. Quea quene jjashahuaba tiitiiqui ajja esejaya mimishi cuanajo —jamaya Eyacuiñajjiya eseya huohui meesahua cani.

E'e, jjeya Eyacuiñajjiya ecuana huoojea canaje jama huohuime aa ba'a: —Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Ojaya epeeji cuana pocue!

²⁰ E'e, ecuana Jesosa Quitoja esohui huohuijji poani. Ohuaya ecuana huoojea canaje onijje chachohua. E'e, Eyacuiñajjiya ecuana huoojea canaje ojaya esohui huohuiya miqiana huasijje. Jamajjeya ecuaaya esohui huohuiaña miqianaya

Jesosaja epeeji epo meeji. Jama aña ba'a: — ¡Jesosa esejaya mimishi cuijea'yojji mano'yonaje Eyacuiñajji ese nijje quene'ama epo'yojji. ¡Jesosaja epeeji pocue, Eyacuiñajjija pea'ai! —ecuana poani.

²¹ Jesosa Quito quea pame po tiitiinaje mimishi'ama nei. Jamatii Eyacuiñajjiya jama acanaje ba'a: —Ojjañaja mimishi cuana Jesosa Quitoja poaje. Jiquio ecua miquianaaya aquiana aboaña jama ohuaya mimishi abo caje. Jamajjeya eyaya oya quea nee nee po mee'yo majje ojjaña mimishi cuana enapa tiitii'yojji pojjeama ca onijje jjapeequi'yajo —Eyacuiñajji poanaje. Jamajjeya Eyacuiñajjiya huohui canaje jama pea'ai ba'a: — Ojjaña Jesosa nijje jjapeequiani eyaya baña ecuea epeeji, shajjama' pojjeama —Eyacuiñajji poanaje.

6

¹ E'e, ecuaaya Eyacuiñajji nijjeya ojjaña huasijje esohui quea pame nee Jesosajo huohuiaña. Jamajjeya ecuaaya miquiana huohui neineiaña jama ba'a: — ¡Eyacuiñajjija esohui shajja'ajja majje jamaya pocue! ¡A'a shajjama' pojji! Shajjama' cuana eba'e meeji pojjeama eyajo Jesosa nijje.

² ¡Eyacuiñajjija esohui shajja'ajjacue! Yahuaajo nei nei ohuaya tehue mee ca poa jama ba'a:

“Jjeya nei miquianaya enijje mimiani miquiana mimishi cuijea'yojji. Eyaya miquianaya shajja'ajjanaje. Enijje mimianijo, eyaya miquianaya ba'e tiitii meeje'yo pea'ai”.

Jamaya Eyacuiñajjija esohui yahuaajo nei etehue'yo poa.

¡Bacue oe! Jjeyahua nei Eyacuiñajji miqiuana shajja'ajja sa poani. Jjeya nei ohuaya miquiánaya ba'e tiitii mee sa acani ojaya epeejji nei nei epojji.

Pabo quea nee nee poanaje

³ Ecuaya Jesosaja esohui jayojja jama atiitiaña quea ja'a nee. Jamajjeya ojjaña ecuana ba majje Jesosaja esohui shajja'ajja caje'yo. Jamaya ameeme ajja ba'a: —E'e de, Jesosaja epeejji cuana quea mimishi nee poani. Jamajjeya ecuana ojaya epeejji po sa po ajja —jama siajje pomeya epojji pojjeama.

⁴ Chojja. Ecuana ba majje ojjaña caba cahua ecuana Eyacuiñajji quea pame nee chacochoani jamatii onaa napa caniya tii. Quea pame nee po tiitiani. E'e, onaaya ecuana quea nee po mee cani, ecuana niñeba cani, Jesosa nijje jjapeequianijo eba'ejji quea camaja poani pea cuana quea mimishi poanijo. ⁵ Maaya ecuana cuia majamaja canaje, jeanobiajea majamaja canaje, ecuana nijje quea quene nee po majje quea huiso jjachichaquinaje. Ecuana cojja neijo nequi majje janobajjima mimipanajajinaje. Ecuana quea camaja chacocho majje cahui jjima tii aninaje. Quea shoe po majamajanaje pea'ai. Jamatii ecuaaaya esohui quea pame Jesosajo huohui majamajaña, huea'ama nei nei ecuana poani. ⁶ Mimishi'ama nei nei ba'yani pea'ai. E'e, ecuana chacochochoani Jesosajo quea pame nee. Quea huiso esohui Jesosaja ecuanaja eba quea ja'a nee. Ecuana quenequene cuaji ajja pea cuana nijje. Quea bei poani. Dejja tai'ama poani. Edojjoshahua Pameya quea pame nee ameesahua

cani pea'ai. Pea cuana ecuanaja quea jea nee poani e'e jojo nei pea'ai. Jamajjeya ojjaña ba cani ecuana Jesosa Quitoja echacojji quea ja'a nee. ⁷ Ecuanaja esohui e'e jojo nei poani. Eyacuiñajjiya huohui meesahua canijo ecuanaja esohui quea ja'a nee poani. Eyacuiñajjija emimishi cuijea'yo jjejojo ecuana ba'yani quea ja'a. Jamajjeya ecuaaya eshahua epeeji cuana mimicuaiejanobiajeaña esohui e'e nei mimi majje. Eyacuiñajjiya ameesahua canijo esohui e'e nei mimi ani tii. ⁸ Cuanaya eya quea pame nee poanijo jamaya cuana poani ba'a: —Pabo quea pame nee poani.

Beca cuana jama poani ba'a: —Pabo ecuea boti'ama, Jesosaja esohui huohuijjiyojo.

Pea cuana ca ca jama poani ba'a: —Paboya esohui quea ja'a nee.

Beca cuana ca jama poani ba'a: —Chojja, Paboya esohui shajja'ajja sa po ajja ca iña.

Pea cuaa ca jama saja'ame acani ba'a: —Pabo Eyacuiñajjija esohui huohuijji quea ja'a nee.

—Chojja, Pabo esohui huohuijji nisho. Oya siajje pojji —jama eya niñebameya acani cuaa.

⁹ —Pabo ecuea eba. Ohuaya quea pame nee huohui cani —beca cuana poani.

Pea cuana ca jama poani ba'a: —¿Ae shai poani Pabo? Oya ecuea ba jjima —poani.

Pea cuaa eya cuiajea sa acani. Jamatii eya eshe nequi, mano'yo jjima. Niñeba majje eya cuia canaje cuaa. Jamatii Eyacuiñajjiya jaahuana canaje jjejojo eya mano'yo jjima. ¹⁰ Quea huiso epeeji nisho poanajejo, eya quea yeno poani. Jamatii Eyacuiñajjiya eya quea bihui nee po mee

cani. Eya aema' poanaje pea'ai. Jamatii ecuea esohui shajja'ajja majje quea huiso Jesusaja epeeji poani, quea pame ba'yani. E'e, Jesusaja epeeji poanijo eseya quea aquiana huiso nee nee jayojja. Jiquio meshijo ba'yanijo ca ca eya e'aquiana mese pojjeama. Jamatii Jesusaja epeeji poanijo ecuea quea huiso aquiana yani eyajo.

¹¹ Ecuea epeeji cuana Conitojo ba'e, eyaya ojaña ecuea ejjashahuabaquijji huohuiaña quea ja'a nee miqiana huasijje miqianaya ecuea quea jea nee nee poanijo. ¹² E'e, miqiana nijje jjapee neineiquiani, miqiana quea jea nee nee poanijo. Miqianaya ca ca enijje jjapee neineiqui sa po'yo ajja. ¹³ Jamajjeya epeeji cuana, ecuea esohui miqiana huasijje jama ba'a: —¡Jiquio ecua miya ecuea quea jea nee nee jamaya oe eya acue miquiaaya! ¡Enijje jjapee neineiquicue! —eya poani.

¡Dejja mimishi nijje a'a jjapee neineiquijji!

¹⁴ Miqianaya Jesusaja epeeji cuana poanijo ja'a nequijji Jesusaja epeeji pojjeama cuana nijje! ¡Ojaya epeeji cuana jayojja a'a pojji! Jesusaja ejjashahuabaquijji Edosiquiana neija ejjashahuabaquijji jama pojjeama. Pea oya, de. Jesusaja esohui quea ja'a nee cuaquijji jayojja. Edosiquiana neiya ca ca quea mimishi nee nee, quea tai nee nee acani. Ojee nequi ajja Jesusaja epeeji Edosiquianaja epeeji nijje. Pea oya, de. ¹⁵ Jesosa Quitoja ejjashahuabaquijji quea pame nee nee. Edosiquianaja ca ca quea tai. Pea

ojaya, de. Jesosa Quitoja epeeji cuanaja ej-jashahuabaquijji quea pame. Ojaya epeeji pojjeama cuanaja ejjashahuabaquijji ca ca quea tai. Pea ojaya, de. ¹⁶ Eyacuiñajji equi yasijje Jesusaja epeeji cuana dobiqiuani ojee Eyacuiñajji bihuiaa, eyacuiñajji nisho bihuiaa pojjeama. Maya quea tai. Cuanaya Jesusaja epeeji cuana huasijje Eyacuiñajji dobiquinaje. Jamajjeya eshahuaaja epeeji cuana nijje jjapeequi meemee ajja. Yahuajo nei Eyacuiñajjiya esohui huohui mee ca poa ojaya epeeji cuana huasijje jama ba'a:

“Miquianaya ecuea huapa pojjeama cuana poanijo, eya miquiana huasijje dobiqiuani, miquiana nijje jjapee tiitiqiuani pea'ai. E'e, eya oe nei miquea Eyacuiñajji. Miquianaya jaahuana tiitiaña pea'ai. Miquiana ecuea epeeji cuana poani”.

Jamaya pea esohui etehue'yo poa pea'ai ba'a:

¹⁷ “Jamajjeya ¡ecuea epeeji pojjeama cuana nijje a'a jjapee tiitiqiuji! ¡Enijje nei oe jjapee tiitiqiuicue! ¡A'a quea mimishi pojji! Jamajjeya eyaya miquianaya ba'e meeje'yo enijje. ¹⁸ Cuanaya eya miquianajaya Chii nei poaje. Miquianaya ecuea ebacua piona cuana, ecuea ebacua ejja cuana poaje'yo pea'ai. Eyaya mi jaahuanajji quea ca'a neeya jamaya aña”.

Jamaya Eyacuiñajjiya yahuajo nei huohui ca poa.

7

¹ Ecuea epeeji cuana, ¡shajja'ajjacue mo! Eyacuiñajjiya jiquio esohui huohui canaje esejaya ebajji, ese jaahuanajji poaniya. Jamajjeya

ja'a quea mimishi ba'ejji; a'a quea mimishi jashahuabaquiiji pea'ai! Miquianajaya eba Eyacuiñajjiya ojjaña mimishi cuana quea nee nee po mee caje'yo tii tii. Jamajjeya ¡quea pame nee nee oe acue! ¡Eyacuiñajjiya ejjashahuabaquiiji jama oe pocue! ¡Oya oe shajja'ajjacue!

Pabo quea bihui nee poanaje

² ¡Eya quea jea nee acue! Eyaya miquianaya quea pame nee a'yonaje. Ecuea esohui quea pame poanijojoya miquianaya quea pame nee nee po meeje'yo. E'e, miquianaya ecuea edasiajji pojjeama. ³ Eyaya jiquio esohui huohuiaña miquiana tecueajji pojjeama. Chojja. Yahuajo eyaya huohuinaje jama ba'a: —Miquianaya ecuea quea jea nee nee. Jamajjeya eya miquiana nijje ba'e majje quea bihui nee poaje. Cuanaya miquiana nijje nequi majje eya manoje'yo pojja'a. Jamatii, jamaya quea pame nee miquianaya ecuea quea jea nee poanijo.

⁴ Ecuea eba miquiaaya ecuea esohui etehue'yo jayojja jama aje'yo. Jamajjeya eyaya miquianajo jama huohuiaña ba'a: —Jesosaja epeejji cuana Conitojo ba'eya ecuea esohui etehue'yo jayojja jama acani —eya poani.

E'e, miquianajo eya quea bihui nee poani. Pea cuaa eya quea nee nee po mee cani Jesosa nijje jjapeequianijo. Jamatii eya quea bihui nee nee poani miquiana quea pame nee nee poanijojo.

⁵ Ecuea epeejji Conitojo ba'e, eyaya miquianaya huohuije ecuea eba'ejjijo pea meshijo. Eya

Masenonia meshijo nequi pea cuaa napa majamaja canaje, niñeba majamaja canaje pea'ai. Jamajjeya eya quea ajjajja poanaje. ⁶ Jamatii Eyacuiñajjiya ojaya epeeji quea yeno nee nee poajo jaahuana cani. Jamajjeya ohuaya Tito huoojea ca'yonaje e quea bihui po mee'yojji. ⁷ E'e, Tito ba majje eya quea bihui nee poanaje. Ohuaya miquianajo huohui canaje quea pame jama ba'a: —Pabo, Jesusaja epeeji cuana Conitojo ba'eya eya, Tito, jaahuana ca'yonaje quea pame nee. Miya ojjañaja quea jea nee poani, Pabo. Yahuajo onaaya esohui huohuijji nisho shajja'ajja canaje. Jamajjeya miya quea yeno poanajejo, miquea epeeji cuana pea'ai quea yeno poanaje. Miya ona nijje quea bei po mee o'oya sa acani cuaa — jamaya Tito poanaje.

Jamajjeya miquianaya ejo jjashahuabaquian-ijo, eya quea bihui nee poani.

⁸ Yahuajo eyaya pea tehue'ya poa quea tecue. Ma esohuijya miquianaya quea yeno poanaje. Quea camaja nee ma esohui etehuejji poanaje, miquiana tecueajji. Jamatii, ma etehue'yojo miquianaya quea yeno po tiitii ajja. ⁹ E'e, ma esohui etehue'yo ba majje miquianaya quea yeno poanaje. Quea yeno po majje miquianajaya mimishi pajea'yonaje. Esohui huohuijji nishoja esohui siajje shajja'ajja pajea'yonaje pea'ai, miquianaaya. Jamajjeya miquianajo eya quea bihui nee poani. E'e, quea yeno poanajejo, Eyacuiñajjiya miquianaya ba'e meesahua ca'yonaje quea pame nee. Jamaya quea pame nee miquianajo. ¹⁰ Deija cuana quea mimishi poani Eyacuiñajjiya quea yeno po mee cani oja

mimishi pajea'yojji. Mimishi pajea'yo ca'yajo, Eyacuiñajjiya ojaya mimishi cuana cuijea ca'yani. Eshahuaja epeeji cuana quea yeno poani mimishi amajje. Jamatii Eyacuiñajjiya oya cuana quea nee nee po tiitii mee caje'yo mimishi pajea sa po'yo ajjajojo. ¹¹ E'e, Eyacuiñajjiya miquianaya quea yeno po mee ca'yonaje. Quea yeno po majje miquianaya quea pame nee poani. Shajjama' cuana, mimishi cuana miquiana nijje nequi. Ojaya mimishi cuana cajaa añña miquianaaya. Oya miquianajaya epee'yojji pojjeama; miquianaya onaya jayojja jama po ajja. Quea quene poanaje pea'ai esohui huohuijji nisho cuana nijje e siajje ajjijojo. Miquianajaya eba Eyacuiñajjiya quea nee nee po mee caje'yo ojjaña mimishi cuana. Jamajjeya quea mete nee po majje mimishi cuana a sa po'yo ajja. Cuanaya enijje jjapee neinei qui sa poani, quea bei. Miquianajaya Eyacuiñajji quea boti nee poanijo esohui shajja'ajja o'oya sa poani. E'e, miquianaya quea ja'a jjashahuabaquianijo, ecuea eba miquianaya mimishi poani nijje jjapeequi'yo ajja. Jjabahuejjaqui meesahuaje'yo Jesosa nijje ejjapeequijji. Jamaya quea pame nee.

¹² Jamajoya eyaya yahuajo esohui tehue majje miquiana huasijje huoojeanaje. Eyaya maya esohui tehuenaje miquiana jjashahuabaqui meeji jama ba'a: —E'e de, Pabo Eyacuiñajjiya huoojea'yo esohui huohuijji. Oya ecuanaja quea jea nee. ¡Oja tehue jayojja jama ejja'aqui o quea bihui pojji! — jamaya miquianaya jjashahuabaquinaje.

Maya esohui eyaya tehuenaje dejja quea mimishi cuana tecueajji. Ma dejja cuanaja mimishijo pea cuana quea yeno poanaje. Eyaya

ma esohui tehuenaje dejja quea yeno ani cuana yeno'ama po mee'yojji pea'ai.

¹³ Jamajjeya ecuea etehue'yo ba majje miqúanaya quea ja'a jjashahuabaqui o'oyani. Jamajjeya eya quea bihui nee poani.

Yahuajo miqúanana nijje mimi jjimahuajo Tito quea yeno jjashahuabaquinaje jama ba'a: —Jesosaja epeeji cuana Conitojo ba'e quea mimishi jea nee nee.

Jamatii miqúanana nijje mimi majje Tito quea bihui nee poanaje. Jamajjeya eya quea bihui nee poanaje Titoja esohui shajja'ajja majje miqúanajo ohua huohui cajje. ¹⁴ Yahuajo eyaya oya huohuinaje jama ba'a: —Tito, Jesosaja epeeji cuana Conitojo ba'e minijje jjapeequije'yo. Miquea esohui shajja'ajja caje pea'ai —eyaya anaje.

E'e, ecuea esohui Tito nijje jayojja jama a'yonaje miqúananaaya. Jamajjeya miqúananaaya quea pame anaje; eya bicho'ama miqúanajo. ¹⁵ Miquiana huasijje poqui jjimahuaja miqúanaya Titoja quea boti nee pishana. Miquiana que poqui majje miqúanaya ojaya quea boti nee nee. Oya quea bihui nee nee pea'ai. E'e, miqúanajo jama poani ba'a: —E'e, Jesosaja epeeji cuaa Conitojo ba'eya ecuea esohui shajja'ajja canaje quea jaji nee. Ohuaya ojjaña ecuea esohui shajja'ajja neinei canaje eya etecuea poajeya jjejojo. Ecuea esohui jayojja jama a sa poanaje —Tito poanaje.

¹⁶ E'e, ecuea eba miqúanaya ecuea esohui jayojja jama poaje. Jamajjeya eya, Pabo, miqúanajo quea bihui nee poani, de.

8

¡Jesosaja epeeji cuana ba'e meesahuacue!

¹ Ecuea epeeji cuana Conitojo ba'e, jjeaya eyaya miqúanaya huohuije Jesosaja epeeji cuana Masenonia meshijo ba'ejo. Eyacuiñajjiya oya cuana ejjeshejji quia meesahua canaje Jesosaja epeeji cuana Jodea meshijo ba'e yasijje equiajji.

² E'e jojo nei quea camaja nee nee onajaya eba'ejji, Masenonia meshijo ba'eja. Aema' cuana poanaje. Jamatii onaaya ejjeshejji quia canaje quea bihui nee Jesosaja pea epeeji aema' nei cuana ba'e meesahuajji. Quea bihui nee nee poanijo quea huiso quia sa poanaje. ³ Ecuea eba oya cuana aema' poanaje. Jamatii ejjeshejji quia canaje. Quia majje quea camaja, aema' nei poanaje. Ecuea oya cuana huohui jjima ejjeshejji quiajji, pea cuana ba'e meesahuajji. Chojja. Jamatii quia canaje. ⁴ Oya cuana enijje mimi majamajanaje jama ba'a: —¡Ecuanaja ejjeshejji dojocue! ¡Quiacue Jesosaja epeeji cuana Jodea meshijo ba'e yasijje ona ba'e meesahuajji! Jamaya ecuana a sa neinei poani —poanaje Jesosaja epeeji cuana Masenonia meshijo ba'e.

⁵ Eya jjashahuabaquinaje jama ba'a: —Onaaya ejjeshejji quia caje oe pojji pojja'a, quea huiso pojja'a.

Chojja de. Oya cuana jama poanaje ba'a: —Ojjaña ecuanaya Eyacuiñajjiya esohui jayojja jama poaje'yo. Cuanaya ojjaña ecuanajaya aquiana ojaya poani —jamaya oya cuana poanaje —. ¡Ecuana huohuicue Eyacuiñajjiya ejjashahuabaquijji! Miquea esohui jayojja jama

ecuana poaje'yo —jamaya Jesusaja epeeji cuaa Masenonia meshijo ba'eya huohui canaje.

⁶ E'e, quea ja'a nee acanaje. Jamajjeya eya Tito nije miminaje jama ba'a: —Tito, ¡Jesusaja epeeji cuana Conitojo ba'e yasijje poqui o'oyacue! Yahuajo miya ona nije miminaje ejjeshejji Jesusaja pea epeeji cuana huasijje equiajji, ona ba'e meesahuajji. Jamatii ejjeshejji huoojea jjima. Jamajjeya ijjeya ona nije mimi o'oyacue ejjeshejji equiajjijo! ¡Jama acue ba'a: “Jesusaja epeeji ba'e meesahuañajo miquianaya quea pame nee poani Jesusajo” jamaya acue, Tito! —eyaya Tito huoojeaña ma esohui huohuiya.

⁷ E'e epeeji cuana, miquianaya quea pame nee poani jama ba'a: Jesusaja esohui jayojja jama poani. Miquianajaya esohui Jesusajo quea pame pea'ai. Miquianajaya eba quea huiso esohui Jesusaja. E'e jojo nei quea ja'a nee jjashahuabaquiani pea'ai. Eya miquianajaya quea jea nee poani pea'ai. Jamatii jjeya Eyacuiñajjiya miquianaya ejjeshejji quia meesahua cani Jesusaja epeeji Jenosanenajo ba'e yasijje ona ba'e meesahuajji. Jamaya quea pame pea'ai. Onaa napa cajje oya cuana aema' nei. Napa huicha'a huicha'a canaje cuaa Jesusaja epeeji poanijojo. ⁸ Ecuea Tito miquiana que huoojea jjima ejjeshejji quia meeya. Chojja. Jesusaja pea epeeji cuaa jamatii ejjeshejji quia canaje quea bihui nee. ¿A'a miquianaya onaya jayojja po sa poani pea'ai? ¿A'a miquianaaya quea pame nee aje pea'ai? ⁹ ¡Jashahuabaquicue Jesusaa miquianaya quea pame nee nee acanaje! Jama ba'a: Jesosa ba jjimahuajo miquianaya aema' jayojja poanaje.

Jamatii ohuaya, Jesosa Quitohua, esejaya Emeshi Mese neiya miquianaya ba'e tiitii mee caje'yo oni-jje eyajo quea ja'a nee nee. Dejja cuana huasijje poe jjimahua Jesosa ba'e'yonaje eyajo quea ja'a nee nee. Meshi yasijje poe majje ca ca dejja cuana jayojjaya poanaje, aema' pea'ai. Jamaya oya poanaje miquiana ba'e tiitii mee'yojji eyajo.

¹⁰ Jamajjeya miquianaya ejjeshejji quiajjijo eya jama poani ba'a: Oe shequiaja yahuajo miquianaya ebionei jjashahuabaquinaje ejjeshejji aema huasijje equiajji. Pea cuana jjashahuabaqui jjimahuajo miquianaya quia sa poanaje. ¹¹ E'e, miquianaya ejjeshejji quia sa poanaje. Jamajjeya ijjeya miquianajaya ejjashahuabaquijji yahuajo jayojja jama acue! ¡Miquianajaya aquiana quea huiso yanijo quea huiso quiacue pea'ai! ¡A'a quea bejjo nahue pojji! ¹² Aquiana quia sa poanijo, Eyacuiñajji quea bihui nee poani e'aquiana mese nijje. Ojaya Eyacuiñajji quea jea nee poanijo e'aquiana meseja aquiana quea huiso poanijo quea huiso quia caje pojja'a. Aquiana oe pojji poanijo ca ca oe pojji aquiana quia caje. Jamatii Eyacuiñajjija eba esejaya aquiana quea huiso pojja'a, oe pojji pojja'a. ¿A'a aquiana cuana miquianajaya quea nahue? ¹³ Onaa napa cajje aema' nei nei ani quea camaja. Oya cuana miquiana aquiana quiajje aema' nei epo'yojji pojjeama. Ma aema huasijje quea huiso aquiana quia majje miquianaya aema' nei poaje pojja'a. ¡A'a jamaya pojji! Chojja, jamaya eya huohui jjima. Eya jjashahuabaquiani jama ba'a: —Oe Jesusaja epeejjija aquiana cuana quea huiso poajo epeejji aema huasijje iye huiso quia

majje chama' aema' poaje.

Jamaya eyaya amee sa aña. ¹⁴ Jjeya nei miqúanajaya aquiana quea huiso. ¡Jesasaja epeeji aema huasijje quíacue! Quia majje oya cuana aema' pojjeama poaje. Quea ja'a ba'eje'yo. Quijje miqúanaya aema' poajo, onajaya aquiana yanijo quia caje'yo miqúanana huasijje pojja'a. E'e, ojjaña aquiana cuana pea cuanaja aquiana cuana oya huisoajja poaje. ¹⁵ E'e, esohui etehue'yo yahuajo nei jayojjaya jama poani ba'a:

“Beca equé mese cuaa oe pojji bobi chicha canaje. Pea equé mese cuaa bobi quea huiso nee nee chicha majje nahue'ama poanaje bobijo. Jamajjeya ojjaña cuana bobijji poanaje, pea cuanaja bobi oya huisoajjaya poanaje”.

Pabohua Tito huoojea caje Conito cuiñajji yasijje

¹⁶ Eyaya Eyacuiñajji bihuiaña jama ba'a: — Eyacuiñajji, miyaya Tito jjashahuabaqui meenaje quea ja'a nee miquea epeeji cuanajo, Conitojo ba'ejo. Jamajjeya oya e jayojjaya onajo jjashahuabaquiani. Conitojo ba'e cuana quea ja'a nee ba'e mee sa acani Jesusajo. E'e Eyacuiñajji, jamaya miyaya Tito ameesahuanaje —jamaya eyaya Eyacuiñajji bihuiaña.

¹⁷ E'e epeeji cuana, ecuea esohui etehue'yo miqúanana huasijje ejjesheji aema huasijje equiajji ba majje Tito quea bihui nee poanaje. Miqúanana huasijje poqui sa poani ecuea esohui etehue'yo huohuiya. Eyaya oya huoojea jjima. Chojja, oya jamatii poqui sa poani miqúanana que. ¹⁸ Tito nijje eyaya pea dejja huoojeaña, Jesusaja epeeji

pea'ai. Maya poquinaje ojjaña Jesusaja epeeji cuana huasijje esohui Jesusajo huohuiya. Shajja'ajja majje ojjaña Jesusaja epeeji cuaa huohui canaje jama ba'a: —Maaya Jesusajo quea pame nee esohui huohui cani —acanjaje cuaa.

¹⁹ Jesusaja epeeji cuaa pea cuiñajji cuanajo ba'eya jiquio epeeji babaca canaje enijje epoquijji Jenosanena huasijje ejjeshejji aema huasijje dojosahuaa. Jamaya eya ejjeshejji dojo sa neinei poani Jesusaja epeeji aema' poani yasijje ona ba'e meesahuajji. Jamajoya pea cuana Jesusajo jjashahuabaquije jama ba'a: —E'e de, Jesusaa ojaya epeeji cuana quea ja'a nee ameesahua cani. Jesosa ca ca oe quea pame nee nee poani —poaje cuana.

²⁰ Ma epeeji enijje poquianiya ohuaya ba caje eyaya e'e jojo nei ma ejjeshejji aema huasijje quiaña. Jamajjeya pea cuana ejo sijje epojji pojjeama jama ba'a: —Pabo ejjeshejji siijji pojja'a —pea cuana jamaya epojji pojjeama.

²¹ E'e, eya jjashahuabaquiani jama ba'a: —Eyaya quea pame nee ejjeshejji dojoje. Jamajjeya ojjaña ba caje eya siipojji pojjeama. Jesusaja eba eyaya quea ja'a nee ña.

²² Tito nijje eyaya beca dejja huoojeaña miquiana baa. Maya ecuea eba. Oya pea'ai quea ja'a nee po tiitiiani. Jesusajo chaco cani. Jjeya maya miquiana nijje quea ja'a nee nequije. Miquianajo jjashahuabaquiani jama ba'a: —Jesusaja epeeji cuana Conitojo ba'e quea pame nee poani. Quea bejjo nahue pojjeama, shajjama' pojjeama pea'ai poani.

²³ E'e pojja'a pea cuaa huohui'ajja caje: —¿A'ya cuae Tito?

Jamajjeya ¡oya cuana huohuicue jama ba'a: — Titohua Pabo nijjeya esohui quea pame nee Jesosaja huohui cani. Ohuaya Pabo miquiana nijje chaco meesahua cani —huohuicue!

Pea dejjaa ma beca epeeji cuanajo huohui'ajja cajo, jama acajo ba'a: —¿Aya acuae oya cuana huoojea canaje? —acajo, ¡oya cuana huohuicue jama ba'a: —Jesosaja epeeji cuaa beca epeeji huoojea canaje miquiana huasijje, miquiana Jesosajo ba meesahuaa. Ohuaya Jesosajo huohui cani quea pame nee nee pea'ai —acue!

²⁴ Jamajjeya ¡jiquio Jesosaja epeeji cuana quea jea nee acue! ¡Oya cuana jaahuanacue quea pame nee! ¡Oya cuana shajja'ajjacue pea'ai! Ma ba majje ojjaña Jesosaja epeeji cuaa ba caje miquianaya Jesosaja epeeji quea ja'a nee poani pea'ai. Jamajjeya ojjaña ba caje ecuanaja esohui quea pame miquianajo e'e nei poani pea'ai.

9

Ejjesheji Jesosaja epeeji cuana huasijje equiajji

¹ Eyaya miquiana huasijje esohui etehue majamajaji pojjeama Jesosaja pea epeeji aema' ba'e meesahuajji. ² Chojja. Ecuea eba miquianaya pea cuana ba'e meesahua sa neinei poani. Jamajjeya eyaya Jesosaja epeeji cuana Masenonia meshijo ba'e huohuinaje jama ba'a: —Jesosaja epeeji cuaa Acaya meshijo ba'eya ejjesheji chicha sa acani aema huasijje equiajji. Jamaya ohuaya acanaje oe shequiaja yahuajo —jamaya eyaya pea cuana huohuinaje.

Ma esohui miquianajaya shajja'ajja majje pea epeeji cuana ejjeshejji chicha sa poanaje pea'ai Jesosaja epeeji aema huasijje equiajji. ³ Jjeya eyaya beca cuana, Jesosaja epeeji cuana huoojeaña miquiana huasijje. Jamajjeya ¡ecuea esohui ma ecua eyaya yahuajo huohuinaje jayojjaya oe acue! E'e, ma beca epeeji cuaa miquianaya ojee iyaa caje ejjeshejji echichajji, aema' nei Jodea meshijo ba'e yasijje equiajji. Jamajjeya miquianajaya ejjeshejji equiajji apoa poaje pea cuana poe jjimahuajo. ⁴ E'e, Jesosaja epeeji cuana Masenonia meshijo ba'e miquiana huasijje poe'yajo, miquianajaya ejjeshejji aema huasijje equiajji apoa ajjimajo quea bicho nee nee poaje miquianaya. Eya pea'ai quea bicho poaje miquianaaya ecuea esohui jama ajjimajo. Quea bicho nee eya poaje. ⁵ Jamajjeya eyaya Jesosaja epeeji beca cuana huoojeaña pea epeeji cuana miquiana que poe jjimahuajo. Ohuaya miquea ejjeshejji aema huasijje equiajji chicha meesahua caje. ¡Miquianajaya esohui yahuajo jayojjaya jama acue! Jamajjeya miquianajaya ejjeshejji equiajji quea huiso poaje, miquianajaya ejjashahuabaquijji yahuajo jayojjaya. Jamajjeya miquianaaya quea bihui nee quiaje'yo.

¡A'a quea dejja tai pojji; a'a quea nishehui pojji!

⁶ ¡Jiquio esohui shajja'ajjacue pea'ai! Oe pojji bana majje quijje oe pojji chichaje'yo. Jiquio ecua eso' jayojjaya jama miquianajaya ejjeshejji poaje. Jjeya quea dejja tai poanijo, quea nishehui poanijo pea'ai oe pojji aema huasijje quiajo, quijje Eyacuiñajjiya oe pojji quia caje'yo miquiana

huasijje. Jjeya quea huiso quiañajo ca ca, dejja tai'ama poanijo ca ca quijje Eyacuiñajjiya quea huiso quia caje'yo miquiana huasijje. ⁷ Jamajjeya ijshahuaba neinei quicue ache huiso miquianaya quia sa poani! ¡Quea bihui nee quiacue! E'e, jmatii miquianajaya ejshahuabaquijji jayojja jama quiacue! Eyacuiñajjiya quea jea nee ojaya epeejji cuana. Ejjeshejji quea bihui nee quia canijo, dejja tai'ama poanijo pea'ai Eyacuiñajji quea bihui nee poani. ⁸ E'e, Eyacuiñajjiya aquiana cuana quea huiso nee nee yani. Jamajjeya miquianajaya quea huiso ejjeshejji aema huasijje quia majje, jmatii ohuaya miquianajaya aquiana quea huiso po tiitii mee caje'yo. Miquianaya aema' nei epojji pojjeama. Chojja. Eyacuiñajjiya miquianaya jaahuana cani. ⁹ Yahuajo nei nei esohui etehue'yo jama poa ba'a:

“Ojjaña joya ejjeshejji quea huiso quia tiitii canaje aema' ba'e meesahuajji quea pame nee poanaje. Jamajjeya jjeyahua nei Eyacuiñajjiya oya quea ja'a ba'e meesahua caje. Quijje pea'ai ba'e tiitii mee caje'yo”.

Jamaya yahuajo nei nei esohui etehue'yo poa.

¹⁰ Eyacuiñajjiya eso' quia cani ojjaña huasijje quejo equecuajji. Ohuaya bobi quia cani ojjaña bobiajji pea'ai. Jamajjeya ohuaya miquiana huasijje eso', bobi pea'ai quia majje, ¡miquianaaya aquiana cuana quiacue pea cuana huasijje! Jamaya quea pame nee. ¹¹ E'e, Eyacuiñajjiya miquiana huasijje aquiana mi ba'e meeji quia caje'yo. Jamajjeya miquianaaya pea huasijje aquiana o ba'e meeji quia poquia tiitiije. Jama-joya miquianajaya aquiana quea huiso equia'yo

aema huasijje eya quiajje onaaya huohui caje jama ba'a: —Eyacuiñajji ecuana jaahunajji quea pame nee nee poani. Ohuaya Conitojo ba'e cuana ecuana que quia meeshahua canaje quea huiso, ma ecua Pabohua huohui canaje jama acanaje —poaje quea bihui nee.

¹² Ma aquiana cuana miqianaaya Jesusaja epeeji aema' cuana huasijje quiañajo, quea ja'a nee ba'e meeaña. Cuanaya ma aquiana quea huiso quiañajo, onaaya Eyacuiñajji bihuia neinei cani: —E'e, Eyacuiñajji, jamaya. Miya quea pame nee poani ecuana nijje —poaje.

¹³ E'e, miqianaya dejja tai'ama poanijo, aquiana quiañajo quea huiso ba meeaña miqiana Jesusaja epeeji quea ja'a nee poani. Jamajjeya oya cuana mimije jama ba'a: —Eyacuiñajji, miyaya miquea epeeji cuana quea ja'a nee po meeaña. Miyaya oya cuana quea huiso aquiana quianaje. Jamajjeya miquea pea epeeji cuana huasijje aquiana quea huiso huoojea canaje ona ba'e meesahuajji. E'e, miquea epeeji cuaa Conitojo ba'eya huohui cani oya cuana Jesosa Quitoja epeeji cuana poani. Ecuanaja eba onajaya esohui e'e jojo nei poani miquea esohui jayojja jama oya cuana poanijo —jamaya pea cuaa huohui caje miqianajo.

¹⁴ Jamajjeya miqianaya ojaya quea jea poanijo, Eyacuiñajji nijje mimi majje jama poaje miqianajo ba'a: —Eyacuiñajji, miyaya quea huiso aquiana quianaje ona que. Majoya Jesusaja epeeji cuana Conitojo ba'e quea huiso aquiana quia meesahunaje ecuana que. Ecuana quea jea ameesahunaje. ¡Quea pame nee poanijo, oya

cuana jaahuanacue! —jamaya onaya mimije Eyacuiñajji nijje.

¹⁵ Eyacuiñajji esejo jjashahuabaquiani. Jamajjeya eyaya oya bihuiaña jama ba'a: —Eyacuiñajji, miyaya mique Bacua Ejja huoojeanaje ecuana jaahuanaa. Quea pame nee nee poanaje miya — jamaya Eyacuiñajji bihuiaña eyaya.

Mahuiso ecuea esohui ejjeshejji equiajjijo.

10

Pabo esohui huohuijji nei nei

¹⁻² Jjeya eyaya, Pabohua pea esohui tehueaña. Eyacuiñajjiya eya huoojea canaje miquiana sohui-huohuiya. Jamajjeya ¡shajja'ajjacue mo! Jesosa Quito ese nijje quea bei poani. Jamajjeya eseya ojaya epeeji poanijo, eya miquiana nijje mimi neineiiani jama ba'a: —Beca siajjepojji cuana miquiana nijje mimiani ejo jama ba'a: “Pabo aje oe ecuana nijje nequiahua oya ca'a'ama, quea mete poanaje. Quea huesha nei nequija jjejojo ca ca quea sohui bishaa, quea tecue pea'ai poani; poe majje, cho” oya siajje poani.

¡A'a maya siajjepojji cuana shajja'ajjajji! ¡A'a o jayojja jama mimijji! E niñebajji, eyaya miquiana tecueaje poe majje. Eya quea tecue poaje beca cuana nijje ejo quea tai jjashahuabaquianijo. Oya cuana aje oe jjashahuabaquiani jama ba'a: —Pabo Eyacuiñajjiya huoojea'yo jayojja jama po ajja. Ohuaya ojaya ejjashahuabaquijji jayojja jama poani, Jesosaja ejjashahuabaquijji jayojja jama pojjeama —ejo siajje poani beca cuana.

³ Chojja de. Eseyá Jesosaja epeeji cuana jiquio meshijo ba'yanijo ojjaña quea mimishi mimicuiajeañobíajea sa seya año. Jamatii eshahuaja epeeji cuana jayojja jama jjashahuabaqui ajja eseya. ⁴ Eshahuaja epeeji cuaa onajaya ejjashahuabaquiiji quea tai jayojja jama acani. Eya, chojja. Ecuea ejjashahuabaquiijijo pojjeama eyaya eshahuaja epeeji cuana mimicuiajeañobíajeaña. Eyacuiñajjiya ca ca eya ojaya ejjashahuabaquiiji ameesahua cani. Jamajjeya ohuaya eya ojjaña joya quea mimishi nee poani mimicuiajeañobíajea meesahua cani. ⁵ Ecuea eba Eyacuiñajjiya esohui quea ja'a nee. Jamajjeya beca cuana Eyacuiñajjiya esohui niñeba canijo, eyaya oya cuana mete mee majje mimicuiajeañobíajeaje; jjaniñebapajeaqui meeje'yo. Cuanaya beca cuana Eyacuiñajjiyo quea tai jjashahuabaquiiani mimicuiajeañobíajeaje'yo pea'ai. E'e, Eyacuiñajjiya eya ameesahua canijo, beca cuana quea tai jjashahuabaquiiani eyaya Jesosa Quitoja esohui jayojja jama ameeje'yo. ⁶ ¡Miquianaaya Jesosaja esohui jayojja jama acue! ¡Ojaya epeeji nei pocue! Majoya eyaya shajjama' cuana miquiana nijje nequi, ojjaña quea mimishi poani pea'ai tecueaje.

⁷ Beca cuaa miquiana nijje nequiya e cojja ba majje huohui cani jama ba'a: —Pabo ca'a'ama pojja'a. Sohui sajea'ama. Eyacuiñajjiya huoojea'yo pojjeama, sohuihuohui sahua jjima pojja'a —jamaya poani e ba pishana majje.

Jamatii ecuea ejjashahuabaquiiji Jesosajo onajaya eba pojjeama. Oya nei Jesosa Quitoja epeeji poso jjabaquiiani. Cajjashahuabaquiahua jama

ba'a: —Pabo pea'ai Jesosa Quitoja epeeji poani e'e jojo nei. E'e, Pabo ecuana jayojjaya jama poani —cajjashahuabaquiahua.

⁸ E'e, eya bicho'ama miquiana nijje emimijji. Jama mimi majamajame eya poani ba'a: —Eya iña iquio Eyacuiñajjija esohui huohuijji. Ohuaya eya huoojea canaje miquiana huasijje oja sohui huohuiya, miquiana ojaya epeeji quea ja'a nee po meeya. Eya miquiana jjabahuejjaquianijo quea yeno po mee sa po'yo ajja. Cajaa sa po'yo ajja pea'ai —jamaya eya miquiana nijje mimiani.

⁹ Eyaya miquianaya jjabahuejjaquianijo, quea ajjajja po mee sa po'yo ajja. ¹⁰ Beca siajjepojji cuana miquiana nijje nequi ejo siajje poani jama ba'a: —Paboya esohui etehue'yo quea sohui ja'a poani. Emeshi meseja esohui etehue'yo quea ja'a jayojja jama poani pea'ai. Jamatii oya ecuana nijje nequianijo ca'a'ama poani. Ojaya esohui quea ja'a pojjeama pea'ai —jamaya siajje poani beca cuana.

¹¹ Ma siajjepojji cuana cajjabahuejjaquiahua jiquio jama ba'a: Miquiana huasijje poqui majje jiquio ecuea esohui etehue'yo jayojja jama eyaya aje'yo miquiana huasijje, e'e jojo nei.

¹² E'e, beca siajjepojji, esohui huohuijji nisho cuana miquiana nijje nequi mimiani jama ba'a: —Ecuana ca ca quea pame nee nee poani. ¡Ecuana oe shajja'ajjacue! —jama siajje pomeya poani.

Eya ca ca jjashahuabaqui sa po ajja jama ba'a: —Pea cuaa aje oe quea tai acani. E jayojja pojjeama onaya. Eyaya ca ca oe quea pame nee aña —chojja, jamaya eya, Pabo po sa po'yo ajja.

Ma siajjepojji, esohui huohuijji nisho cuana aje oe jama poani tii ba'a: —Ecuana

ejjashahuabaquijji quea ja'a nee nee, onajaya, chojja. Ecuana jayojjaya jama capo'yahua ojjaña —jamaya poani.

Chojja. Quea ja'a pojjeama jjashahuabaquiani, de. ¹³ Eyacuiñajjiya ca ca eya huoojea canaje miquiana huasijje ojaya esohui huohuiya. Jama-jjeya ojaya esohui eyaya huohuiaña bicho'ama miquiana huasijje. Ojjaña huasijje ca ca huohui jjima. ¹⁴ E'e, miquiana huasijje esohui Jesosa Quitojo eyaya huohuinaje. ¡Bacue! Eyacuiñajjiya eya huoojea canaje miquiana huasijje esohui huohuiya. Ojaya esohui huohuijji e'e jojo nei eya. Eyaya quea ja'a nee huohuiaña. Jiquio ecue tehue'yojo eya bicho'ama. ¹⁵ Cuanaya miquianaya sohuihuohuiañaajo eya siajje po ajja jama ba'a: —Eya ee nei ojjaña huasijje esohui huohuijji nei quea ja'a nee. Onaya miquiana nijje chaco jjima; siajje poani —eya jama siajje pomeya po ajja.

Esohui huohuijji nisho ca ca oe jama siajje pomeya poani, oe nei esohui huohuijji poso jjabaquiani. Eya ca ca quea pame nee jjashahuabaquiani jama ba'a: —Miquianaaya Conitojo ba'eya Jesosa Quitoja esohui jayojjaya jama quea ja'a añajo eya pea cuiñajji cuana huasijje esohui huohui meesahuaje Jesosaja.

¹⁶ Jamajjeya miquianaya jamaya poajo eya poqui meeje pea meshi cuana huasijje esohui quea pame nee huohuiya Jesusajo, onaja esohui huohui jjima huasijje. Esohui huohuijji pea meshi cuanajo enequijo eya ona nijje enequi tiitiijji pojjeama. Iña ca jja ca poquije, de, pea cuana huasijje

Jesosaja esohui huohuiya. ¹⁷ E'e, yahuajo nei esohui etehue'yo jama poa ba'a:

“¡A'a jama huohuijji ba'a: —Eyaya jamatii quea pame aña. Chojja, jamaya pojjeama. Jamaya huohuicue ba'a: —Eyacuiñajjiya eya quea pame nee ameesahua cani. Jamajjeya eyaya quea pame aña —jamaya acue!”

Yahuajo nei esohui etehue'yo jamaya poa. ¹⁸ Eyacuiñajji ojaya epeejji quea pame neejo mimiani jama ba'a: —Jiquio epeejjiya quea pame nee acani. Jamaya ecuea quea boti nee.

Beca cuaa ca ca huohui cani jama ba'a: —Eya quea pame nee poani jamatii. Jamajjeya jecuea esohui shajja'ajjacue! —jamaya esohui huohuijji nisho poani onajaya quea jea e'ajji. Jamaya ca ca Eyacuiñajjija boti'ama.

11

Esohui huohuijji nishojo Pabo quea yeno mimiani

¹ Dejja ma ohua acanajejo jjashahuaba tiitiiquianijo esho'i jama mimijajiani, de. Jamatii ma eya anajejo mimianijo, ¡a'a jja oe enijje quea quene pojji! ¡Shajja'ajja socue mo! ² E'e, miquianaya Eyacuiñajjija quea jea nee nee poanijo, ecuea quea jea nee nee poani pea'ai. E'e, eyaya miquianaya Jesosa nijje jjapee coo meesahuaquinaje. Jiquio ecua ejeajjiya ojaya ebacuase mimishi'ama nei huana mee sa acani jayojja jama eyaya miquianaya Jesosa nijje jjapeequi mee sa aña quea boejea nee, eshahua nijje pojjeama. ³ Ecuea eba miquianaya Jesosaja epeejji e'e jojo nei po sa neinei poani. Jjeya ca ca

eya quea mete jjashahuabaquiani miquianajo, esohui huohuijji nishohua miquianaya quea tai jjashahuabaqui mee ca chana'. Jiquio ecua Edosiquiana neiya ma ecua peyo jayojjaa Ema dasia ca poa jayojja jama esohui huohuijji nishohua miquianaya dasia ca chana'; Jesosa nijje jjapee pajea meequi ca chana'. ⁴ E'e de, miquianaaya aje oe ojjaña esohui huohuijji nisho shajja'ajjaña. Oya cuana Jesusajo siajje poani, Edojjoshahua Pamejo siajje poani pea'ai. Esohui quea pame Jesusajo ecuanaja esohui jayojja jama pojjeama huohui cani. ¿Apiojji acuaeya oya cuana shajja'ajjaña so'o? ⁵ Oya cuana ca jja ca oe Eyacuiñajjija huoojea'yo esohui huohuijji e'e jojo nei poso nequiaa ña; eya ca jja nequiaa ca oe cajaa ña. Chojja, eya ca ca ña iquio e'e jojo nei Eyacuiñajjija huoojea'yo. ⁶ E'e pojja'a oya cuana mimiani quea bishaa nee. Jamatii esohui quea pame Jesusaja ecuea eba nei nei. Jamaya miquianajaya eba. E'e, eyaya ma esohui huohui neineinaje ojjaña cuiñajji cuana huasijje.

⁷ Eyaya Eyacuiñajjija esohui quea pame Jesusaja huohuinaje miquiana huasijje sosema'. Eyaya ecuea eba'ejji jjeshenaje pea'ai ecue chaco sosejje. Miquea echacojji jayojja jama poanaje eya. Jamaya miquianaya Eyacuiñajjija esohui ba meesahuanaje. ¿A'a jamaya quea tai, quea pame pojjeama? Chojja. Jamatii beca cuana jama poani ba'a: —Pabo pojja'a Eyacuiñajjija huoojea'yo pojjeama. Jamajjeya mi sosequia mee cani esohui huohui cani sosejje —jama siajje pomeya beca cuana poani.

⁸ ¡Bacue! Miquiana huasijje esohui huohuiañajo,

Jesosaja epeeji cuaa pea cuiñajjijo ba'eya eya sosequia canaje. Eya sohuihuohui meesahua canaje. Miquianaya ca ca oe Eyacuiñajjija esohui shajja'ajja majje jamatii sosequia jjima. ⁹ E'e, Jesosaja epeeji cuaa Masenoniajo ba'eya poe majje ecuea eba'eji ye canaje. Yahuajo miquiana nijje ba'eya eyaya miquianajaya bobi ijia jjima: — ¡Che mo oe esohui huohui sosejje! —ajjima ecuea miquianaya. Jamaya eyaya sosema' esohui huohui poquia tiitiije quijje pea'ai.

Jamajjeya miquianajaya jama yajji pojjeama ba'a: —Pabo ecuaaya bobianaje, quea huiso ba'e meesahuanaje —jamaya e'ajji pojjeama miquianajaya.

¹⁰ Chojja. Jamajjeya ojjaña cuaa Acaya meshijo ba'eya ba caje eyaya esohui huohuinaje miquiana huasijje sosema'. Jesosa Quitohua ba cani eya e'e jojo nei mimiani. ¹¹ Jamaya eyaya huohuiaña miquiana ecuea quea jea nee nee poanijo. Jamaya Eyacuiñajjija eba. ¹² E'e, eyaya Jesosajo huohui tiitiije miquiana huasijje sosema'. Jamajjeya esohui huohuijji nishohua jama huohuime yajji pojjeama ba'a: —Ecuana Pabo jayojja chacochoani —jamaya e'ajji pojjeama onajaya.

Esohui huohuijji nisho nequiaa sosequianaje esohui huohui cani sosejje. ¹³ Oya cuana ca ca oma Eyacuiñajjija huoojea'yo nisho poani, Eyacuiñajjija huoojea'yo pojjeama. Miquianaya dasia cani; Jesosaja huoojea'yo esohui huohuijji poso nequiaa ña. ¹⁴ E'e de, Edosiquiana nei Satanasaa jama oya cuana poani. Ohuaya, Satanasaa ojjaña dasia cani; Jesosaja esohuidojojji quea pame nee poso acani cuaa. ¹⁵ Jamajjeya ojaya echacojji

cuaa miqúanaya dasia cani pea'ai jama ba'a: Oya cuana Eyacuiñajjija echacojji quea pame nee poso nequiaa aña, de. ¡Poe o'oya majje Jesosaa oya cuana quea nee nee po mee caje'yo tii tii!

Pabo Jesosaja huoojea'yo poanijo quea nee poa

¹⁶ Jamajjeya eyaya miqúanaya huohui o'oyaje quea bicho pishana. ¡A'a eya esho'i jama mimiani poso ajji ma eya anajejo mimianijo! ¡Miquiaaya ejo jamaya poso aña, jamatii eya che shajja'ajja socue! Ma eya Jesosajo anajejo mimije so'o esho'i jama, onajaya quea jea e'ajji nisho. ¹⁷ Jiquio ca ca ecuea esohui; eya jjeya Jesosa jayojja jama pojjeama mimiani. Eya esho'i jama ma eya anajejo mimiani quea huiso. ¹⁸ Jamatii quea huiso esohui huohuijji nisho esho'i jama ojaya huapa pojjeamajo, ma ohua acanajejo pea'ai mimimimiani. Jamajjeya ona jayojja jama eya pea'ai mimije. Eya ca ca iña quea bicho mimije. ¹⁹ Miquíanaya aje oe jjashahuabaquiani jama ba'a: —Ojjaña ecuea eba. Eya ca ca iña jjadasia meequi ajja esohui huohuijji nisho cuana —jjashahuabaquiani.

Jamajjeya shajja'ajjaña joya esho'i jama joya ohua acanajejo mimiani pea'ai. ²⁰ E'e, ma esohui huohuijji nishohua miya chaco mee cani sosema', minijje ba'yani sosema', miquea aquiana mesena'yo sa acani, miya tanacua cani, cojja cuiapojjea cani pea'ai quea bicho epo meejji. Jamatii miqúianaaya aje oe oya cuana shajja'ajjaña, de. ²¹ ¿Apiojji acuae jja oe shajja'ajjaña? Ecuea ca ca jamaya ajjima. Jamajojoya ¿a'a eya ca'a'ama poso nequiaa aña, de? ¿A'a ma esohui huohuijji nisho cuana esho'i jayojja jama mimiani onaja

quea jea e'ajji? E'e. Jamajjeya eya jamaya mimije pea'ai. ²² Eshohui huohuijji nisho jama poani ba'a: —Ecuana jja iquio Emeo dejja cuana, Emeo esohui mimiani.

¡Dee! Eya pea'ai Emeo dejja, Emeo esohui mimiani.

—Ecuana Isaeni dejja cuana —poani pea'ai ma esohui huohuijji nisho.

Eya pea'ai Isaeni dejja, onaya jayojjaya.

—Ecuana etiiquiana Amajama bajjani —ma esohui huohuijji nisho poani.

Amajama ecuea etiiquiana pea'ai, de.

²³ —Ecuana jja oe Jesosa Quitohua huoojea canaje esohui huohuijji —oya cuana siajje poani.

Eya ca ca e'e jojo nei Jesosa Quitoja huoojea'yo, de. Jjeya eya esho'i jama mimiani. Jamatii eyaya janobajjima nei chaconaje Jesosa nijje. Eshohui huohuijji nishohua aje oe oe pojji chaco cani. Dejja mimishi cuaa eya jeanobiajea huicha'a huicha'a canaje esohui eya ehuohui poaje jjejojo. Oya cuana, cho. Jodio etii cuaa eya cuia majamaja canaje Jesusaja esohui eya ehuohui poaje jjejojo. Ma esohui huohuijji nisho pea cuanaja cuia neinei jjima. Eya beshahua nei mano'yonaje; quea huiso mano huicha'a huicha'a'ajja'yonaje.

²⁴ E'e, ojjaña ba canijo, Jodio etii cuaa eya quea huiso cuiasejja neinei'ajja canaje, 39 cuiasejjame acanaje, de, huaca jee ejeapashajjajaa. Cuiasejja majamaja canaje, me oejje huisome cuiasejjame acanaje; pea meshijo cuia, pea meshi cuanajo cuia ca iña acanaje cuaa, de. Beshahua nei ca iña mano'yonaje mo, de. ²⁵ Jodio cuaa

eya cuiasejja canaje acui sisiya, pea beca pee-
 jjima cuiasejjame acanaje pea'ai. Jaja canaje
 pea'ai meiya eya esohui ehuohui poaje jjejojo.
 Beshahua nei eya hui'i'yonaje, pea beca pee-
 jjima hui'ime poanaje. E'e de, bishe ai cuana
 jaanobiquinaje bae ai yasiije. Jamajjeya oe meca-
 jje, oe pojjajo pea'ai eya bae aijo huepee bia-
 jje jjeejee ba'e'yonaje. ²⁶ Cuanaya eya poqui
 huicha'a huicha'anaje pea cuiñajji cuana huasi-
 jje esohui huohuiya. Poquije beshahua nei eya
 mano'yonaje yohuajo ba'a: cuei quea cuejipashi
 neijo, siipojji cuanajo, Jodio cuanajo, Jodio po-
 jjeama cuanajo pea'ai. Cuiñajji quea quemojo,
 ebiojo pea'ai dejja mimishi cuaa napa cajje eya
 beshahua nei mano'yonaje. Bae aijo beshahua nei
 hui'i'yonaje pea'ai. Jesusaja epeeji nishohua cuia
 cajje beshahua nei eya poquijeyo'yonaje pea'ai.
²⁷ Eyaya chaco neineinaje; cahui jjima poanaje
 pea'ai. Quea camajajo hueahuea'yonaje. Quea
 mano poanaje. Quea shoe poanaje. Quea naba
 taja nee nee poanaje. Bobimajo mano'ajja'yonaje.
 Eya quea huoe nei nei poanaje, daqui mooma'
 poanaje pea'ai. ²⁸ E'e, quea camaja ecuea eba'ejji.
 Cuanaya ojjaña pojjajo eya jjashahuaba majama-
 jaquiani ojjaña Jesusaja epeeji cuana jaahuana-
 jji. ²⁹ Jamajjeya Jesusaja epeeji nei cuana quea
 mete, ca'a'ama poanijo, eya quea yeno nee nee
 jjashahuabaquiani. Oya cuana quea mimishi
 poajo, mimishi pajea mee sa neineiaña eyaya.
 Jamaya eya poanaje.

³⁰ Esohui huohuijji nishohua miquianaya dasia
 canijo, eya camimi majamajaquiahua ecuea
 eba'ejjijo. Jjeya ca ca eyaya miquianaya huohuije

pea esohui. Ma ba majje miqianaaya baje eya quea mete, dejja ca'a'ama jayojja jama poani. ³¹ Eyacuiñajji esejaya Emeshi Mese nei Jesusaja Chii. ¡Oya cabihuia tiitii cahua! Ojaya eba eya e'e jojo nei mimiani jama ba'a: Yahuajo Aneta emeshi mese poa Damasico cuiñajjijo. Ohuaya ojaya echacosahuajji cuana huoojea canaje e sa'ajja'yohua ojjaña ejiojjijje, ba'yo majje e jeanobiajeajji. ³² Jamatii eya ojaya iña jjima, de. Eya Damasicojo nequi quehua poquinaje mecajje. ³³ E'e, Jesusaja epeeji cuaa mei jiyajo nequiya equi huejjajje eya jjepai aijo jjabioquiajo, jeaoquea ca'yonaje cuaa jjonojo.

12

Jesosaa Pabo jjacahuibaqui mee canaje ojaya eba'eji eyajo

¹ Eya esho'i jama ma eya añajo mimi majamajani miqiana sohui huohuijji nisho eshajja'ajja poaje jjejojo. Jjeya ca ca eyaya miqianaya huohuije pea esohui, ma Jesosaa eya jjacahuibaqui mee canaje huohuije. ² Yahuajo nei quea shequiaja huiso, 14 shequiajame yahuajo Jesosaa eya ojaya e'anijji eyajo jjacahuibaqui mee ca poa. Eya jjacahuibaquinaje pojja'a. E'e pojja'a eya eshe dojosohuaqui ca poa pojja'a. Ecuea ba jjima. Eyacuiñajjija ca ca oe eba. ³ E'e, eya pojja'a eshe ba mee ca poa. Jjacahuibaqui mee ca pojja'a mo poa. Eyacuiñajjija ca ca oe eba. Ecuea ca ca ba jjima. ⁴ Jamatii ecuea eba maya: Jesosaa eya ba mee ca poa; ohuaya eya dojosohuaqui ca poa ojaya

eba'ejji Quea Pame Nee bajjani yasiije, Panaiso bajjani yasiije. Jomajo eyaya shajja'ajjanaje esohui quea bame nee nee. Maya eyaya miqúanaya huohui meemee ajja, yajja huohuime yajji jojoya. E'e, Jesosa eyajo ba'e enijje miminaje. ⁵ Jamatii eya ma esohuijo mimi huicha'a huicha'a ajja esho'i jama. Chojja. Eyaya miya ba meeje eya quea ca'a nee nee pojjeama. E'e jojo nei Jesosa enijje miminaje eyajo. ⁶ Jamajjeya ma eya anajejo mimi huicha'a huicha'ajo jamatii eya esohui huohuijji nisho jama pojjeama mimiani. Ecuea esohui ca ca e'e jojo nei. Miquiana nijje ba'eya eyaya chaco neineinaje miquianaaya banaje. Shajja'ajjanaje ecuea esohui Jesusaja esohui huohuiañajo. Jamajjeya ejo jjashahuabaquiani e'e jojo nei miqúanaya. Jamajjeya ma eya anajejo ehuhui majajji pojjeama esho'i jama, de, miquiana ejo jama ehuhui poaje jjejojo ba'a: —Pabo ca ca quea pame nee nee Jesusaja epeejji quea ca'a tii tii —miquianaaya ehuhui poaje jjejojo.

Chojja, eya jamaya pojjeama.

⁷ Jamajjeya Jesusaa eya ojaya eba'ejji quea pame nee nee eyajo ba mee majje Eyacuiñajjiya eya quea nee po mee canaje emanomeejji pojjaja. Jama-joya eya quea ca'a tii tii ejjashahuabaquijji pojjeama. Jiquio ecua Edosiquiana neija Satanasaja huoojea e cuiajji jayojja jama jiquio emanomeejji pojjaja'aa eya quea nee nee po tiitii mee cani. ⁸ Eya Jesosa nijje miminaje pea beca peejjima mimime. Jama poanaje ba'a: —Jesosa Quito, eya quea nee nee nequi. ¡Che mo oe nee'ama po meecue! —eya mimime poanaje.

⁹ Jamatii Jesusaa eya saja'a canaje jama ba'a: — Pabo, e'e jojo nei eyaya miya jaahuanaje. Eyaya miya chaco meesahuaje. Miya ca'a'ama poanijo, chaco neinei meesahuaje, jamatii quea nee — acanaje.

Jamajoya eya ca'a'ama poanijo quea bihui nee poani. E'e, ecuea eba Jesusaa quea ca'a nee nee poaniya eya quea ja'a nee ojo chaco meesahua cani. ¹⁰ Jamajjeya eya quea nee nee poanijo, ecuea eba'ejji quea camaja poanijo pea'ai jamatii eya quea bihui nee poani. Pea cuaa eya napa canijo, mimijajianijo pea'ai, jamatii quea bihui poani. Jesusaja esohui huohuijijojjo, jamaya deja mimishiya eya acani. Jamatii eya quea bihui nee poani tii. E'e, eya ca'a'ama poanijo, Jesusaa eya quea ca'a nee po mee cani.

Pabo Jesusaja epeeji cuana Conitojo ba'ejo quea yeno poanaje

¹¹ Eya esho'i jama ma eya anajejo mimi jamajaje miqiana esohui huohuijji nisho eshajja'ajja poaje jjejojo. Oya cuana aje oe Eyacuiñajjija huoojea'yo esohui huohuijji poso jjabaquiani. Eya ca ca iña e'e jojo nei Eyacuiñajjija huoojea'yo. Miquianaaya ca jja ca oe eya banaje Jesusajo chaco chaco aninaje. Jamatii ejo huohui jjima jama ba'a: —Pabo e'e jojo nei Jesusaja huoojea'yo esohui huohuijji —miquiaa mo che ehuohuinaje ese.

Miquianaaya mo oe che quea pame nee mi huohuinaje, jamajjeya eya ecuea eba'ejjijo camimiquiahua esho'i jama, de. ¹² E'e, eya miqiana nijje nequi Jesusaa eya atiitii mee canaje quea huiso ma dejjaa ajjima acani amee canaje miqianajaya

ebajji. Jamajoya miquea eba eya Jesusaja huoo-
jea'yo esohui huohuijji. ¹³ ¿A'a eyaya miquianaya
quea pame pishana anaje, Jesusaja epeeji cuana
pea cuiñajji ba'e quea pame anaje pojja'a? Cho-
jja. Ohuaya e ba'e meeji quia canaje. Maya eyaya
jshenaje. Miquianajaya quia jjima. Jamatii
ecuea bobijo huohui'ajja jjima. E'e pojja'a eyaya
miquianaya ehuohui'ajjanaje ese jama ba'a: —
¡Jesusaja pea epeeji jama sosequiamaya mo che
acue esohui huohuiaña soseje! —e'anaje ese.
Jamatii jamaya mimi jjima eya.

¹⁴ Yahuajo eya miquiana baa poquinaje beca
poquime. Jjeya eya apoa. Poquije o'oya miquiana
baa. Poqui majje eyaya eba'e meeji mimim-
imi ajja poaje. Chojja. Eya miquianajaya ej-
jesheji sa po ajja. Miquianaya ca ca eya sa
poani ecuea epeeji pojji. Jiquio ecua esho'i cuaa
oja chii, ojaya enaese pea'ai bobia ajja jayojja
jama eyaya miquea bobi sa ajja. Jamajjeya eya
mique chii jayojja jama poanijo eya mi jaahua-
najji poani. Miquianaya ca ca e jaahuanajji po-
jjeama. ¹⁵ Jamajjeya eyaya miquianaya Jesusajo
ba meesahuaje sosema'. Jamajjeya e'e pojja'a eya
aema' poaje. Cuanaya eyaya quea huiso cha-
coje miquiana esohui ba meesahuajji. Eya po-
jja'a hueahueaje miquianaya jaahuanajo. Jamatii.
Ecuea miquianaya quea jea nee nee. ¿Apiojji acuae
eya miquianajaya quea jea pishana, miquianaya
ecuea quea jea nee nee poanijo?

¹⁶ Miquianajaya eba eya miquiana nijje nequi
camaja'ama miquianajo poa. Chojja. Miquiana-
jaya bobi ijja jjima ecuea. Jamatii beca cuana

aje ejo siajje poani jama ba'a: —Pabo siajjepojji. Ecuana dasia ca'yonaje —sijje oya cuana poani.

¹⁷ Chojja de, ecuea miqúanaya dasia jjima. Esohú huohújjija ma eya huoojeanajeja miqúanaya dasia jjima pea'ai. ¹⁸ Eyaya Tito huoojeanaje jama ba'a: —¡Poquicue miya Conito huasijje esohú huohúya Jesosajo! ¡Jesosaja epeeji oe dojocue minijje! —poanaje eya.

¿A'a Titohua miqúanaya dasia canaje? Chojja. Ohuaya eyaya jayojjaya acanaje. Miqúanaya ojaya quea jea nee pea'ai ecuea jayojjaya.

¹⁹ ¿A'a cuae miqúanaya ecuea etehuejo jama jjashahuabaquiani pojja'a ba'a: —Pabohua aje pojja'a jja oe huohú cani oya e'e jojo nei Jesosaja huoojea'yo esohú huohújji. Ecuana Jesosaja huoojea'yo nisho poani —a'a jamaya miqúanaya jjashahuaba taiquiani?

¡Bacue oe! Eyacuiñajjija eba eya Jesosaja esohú jayojja jama e'e jojo nei huohúiaña. Epeeji cuana, miqúanaya ecuea quea jea nee. Jamajjeya eyaya ojjaña aña miqúanaya Jesosa nijje quea ja'a nee ejjapeequi meesahuajji. ²⁰ Jjeya eya poquije miqúanaya baa. Miqúanajo quea yeno jjashahuabaquiani jama ba'a: —¡Dee! E'e pojja'a quea mimishi poani o'oya: Jjamimicúiajea nobiajeaquiani, onaja aquiana jea ba cani, quea quene nee nee poani, quea aquiana nahue poani, quea nishehui poani, mimijajiani, pea cuanajo maimaiani, oya jjeshe sa pojji pea'ai jjejojo mimiani, quea shajjaquijjo, shajjama' poani pea'ai pojja'a —jamaya eya jjashahuabaquiani miqúanajo, Conitojo ba'e cuanajo.

Miquianaya jamaya poajo eya quea yeno nee nee poaje. ¿A'a miquianaya quea yeno poaje miquianajaya mimishijo eya tecueajje? ²¹ E'e, miquiana quea mimishi poani ba majje eya quea tecue nee nee po chana!. Eya quea yeno nee, quea bicho poaje miquianajo. E'e pojja'a eya paje miquiana ba majje, ca beca cuanaja mimishi pajea'yo jjimajo, de, quea mimishi ba'yanijo, quea apo, quea tai, de. Jamaya miquianaya poanijo, eya quea yeno nee nee poaje ba majje.

13

¹ Yahuaajo eya miquiana huasijje poquinaje be-canejjijji pea'ai poquime poanaje. Jjeya eya po-quije o'oya miquiana baa. Jamajjeya ¡bacue! Ey-acuiñajjija esohui yahuaajo etehue'yo jama poa ba'a:

“Oe dejja peajo maimaiani ¡a'a shajja'ajjajji! ¡Be-caa, pea beca peejjimaa oya jayojja huohui cajo, shajja'ajjacue!”

Jamaya tehue ca poa yahuaajo nei.

² Jamajjeya jjeya eya miquiana huasijje poquije o'oya pea beca peejjima poquime epojji. Yahuaajo miquiana nijje nequiya eyaya huohuinaje jama ba'a: —Ojjaña joya quea mimishi po tiitiiani, joya jjeya nei quea mimishi poani pea'ai eyaya tecueajjea neineije poe o'oya majje —jamaya eyaya jjeya miquianaya huohui o'oyaña.

³ E'e, Jesosa Quitohua eya huoojea canaje miquiana huasijje ojaya esohui huohuiya. Ohuaya eya huoojea cani miquiana jjabahuejjaqui meeji pea'ai. Joya miquiana nijje ba'e quea mimishi poani tii tii quea nee nee

po mee caje'yo, ohuaya. ⁴ ¡Bacue! Dejja maseya Jesosa yahuaajo nei acui ecueata'apeejo me cacajea caje oya mano'yonaje. Jesusaja ca ca oya cuana jeabichajea jjima. Jamatii Eyacuiñajjiya quea ca'a nee nee poaniya Jesosa shequi mee ca o'oyanaje; quea ca'a nee nee ba'e tiitii mee cani. Yahuaajo Jesosa ca'a'ama jayojja poa. Jamaya pea'ai eya ca'a'ama. Jamatii Jesusaa eya quea ja'a nee ojaya esohui huohui meesahua cani miquiana jjabahuejjaqui meejji.

⁵ ¡Jjashahuabaquicue! ¿A'a Jesusaja esohui jayojja jama aña miquianaaya? Jesosa Quito miquiana nijje yani. ¿A'a miquianajaya ba jjima? Jesosa miquiana nijje pojjeama ca miquianaya ojaya epeeji nishojo, de. ⁶ Eya ca ca iña Jesusaja esohui huohuijji e'e jojo nei. ⁷ Jamajjeya eya Eyacuiñajji nijje mimiani miquiana mimishi pajea meesahua-jji jama ba'a: —Eyacuiñajji, ¡miquea epeeji cuana Conitojo ba'e mimishi'ama nei ba'e meesahuacue! —eya poani.

Eya jama jjashahuabaqui ajja ba'a: —Jesusaja epeeji Conitojo ba'eca mimishi'ama ba'e ba majje pea cuaa eya bihuia caje, esohui huohuijji nei —jamaya eya po ajja.

Chojja, miquianaaya eya Eyacuiñajjiya huoo-jea pojjeama poso aña; esohui huohuijji nisho poso aña; jamatii eya Eyacuiñajji nijje mimiani miquianaya ojaya epeeji quea ja'a nee eba'e meesahuaaji. ⁸ E'e, dejjaja Eyacuiñajjiya esohui e'e nei ehoojea pajea mee'yojji pojjeama ojjaña huasijje. Jamajjeya ecuea esohui e'e jojo nei, siajje pojjeama. ⁹ Jamajjeya miquianaya quea pame, mimishi'ama ba'e ba majje eya quea bihui nee

poaje. Jamajjeya miquianaya etecueajji pojjeama, jamatii tecuea jjimajo eya Eyacuiñajjija huoojea'yo quea ja'a nee pojjeama poso año. Jamajjeya eya Eyacuiñajji nijje mimiani miquianajo jama ba'a: —Eyacuiñajji, ¡miquea epeeji cuana quea ja'a nee nee ba'e meesahuacue oe! —eya poani.

¹⁰ Jamajjeya miquiana huasijje poqui jjimahuaa eyaya esohui tehueaña miquianajaya mimishi epajea'yojji. E'e, eya Eyacuiñajjija huoojea'yo esohui huohuijji, miquiana jjabahuejjaqui meeji. Eyacuiñajjija eya huoojea jjima miquiana janobajjima nei tecueajeaa quea yeno nee nee epo meeji. Chojja, ohuaya eya huoojea canaje miquiana quea ja'a nee ba'e meesahuaa. Jamajjeya mi ba majje eyaya miquianaya etecueajeajji pojjeama mimishi'ama ba majje.

¹¹ Mahuiso ecuea esohui.

Esohui oe yejje nei etehue'yo

Ecuea epeeji cuana, ¡quea bihui nee pocue! ¡Shajja'ajjacue ecuea esohui! ¡Jama acue! ¡Jashahuaba neineiquicue quea ja'a nee nee eba'ejji! ¡Ojee Jesosa nijje jjapeequicue! ¡Quea bei nee pocue! Jamaya poajo, Eyacuiñajjiya minijje ani tiitiije'yo. Miquianaya ojaya quea jea nee nee. Oya ca ca oe quea bei nee nee.

¹² ¡Ojjaña Jesusaja epeeji nijje mimicue quea bei!

¹³ Ojjaña enijje nequiya miquianaya huohui'ajja cani jama ba'a: —¿Achajja acuae nequiiana so'o? —onajaya ebajji.

¹⁴ ¡Esejaya Emeshi Mese nei Jesosa Quitohua miquianaya cajaahuana cahua! Eyacuiñajjija miquianaya quea jea nee. ¡Onijje caba'e tiitii mee

cahua! ¡Edojjoshahua Pame miquiana nije caj-
japeequiahua tii tii!

Mahuiso. Eyaya, Pabohua jiquio esohui
tehue'yonaje. Apoa.

Eyacuiñajjija Esohui
New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 11 Nov 2022 from source files
dated 29 Jan 2022

88838088-e20d-51ca-8c91-69194f5ae678